

## ***ASO FARAILE, 16 IUNI 2023***

*Na nofoia e le Fofoga Fetalai le Nofoa i le itula e 9.30 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Tualumaga a le Fono Aoao Faitulafono.

Ou te muai faatalofa atu i le mamalu o le tatou Palemene i lenei taeao fou i le afio o lau Afioga i le Sui Palemia, afifio a outou Afioga i Minisita o le Kapeneta, afifio foi a outou Afioga i Minisita Lagolago, afio le Taitai o le Itu Agai ma sui usufono mamalu uma o le Palemene. E le faaitiitia lava le agaga o le faafetai i le Atua i Lana tausiga, e le gata o lenei taeao fou, ae ua tatou aulia mai foi le toe aso o galuega o lenei vaiaso. Malo le folau, malo le soifua manuia ma le lagi e mama.

Le paia i Ofisa Sili o Pulega o Matagaluega ma Faalapotopotoga Tumaoti a lo tatou Malo, ua faamalo le usu i lenei taeao fou. Le tapuaiga a Samoa o lo o faafogafoga mai e le gata i Samoa nei, ae faapea foi i so o se tafa o le lalolagi, i ou paia faalupelupeina, matou faatalofa atu i lenei taeao fou. Faamalo le onosai i tiute ma faiva o lenei vaiaso. Tapuai maia ma le manuia.

## **TUUIINA ATU O PEPA**

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2023/2024 Nu.33, Tali a le Malo i le P.P.2022/2023 Nu.91, Lipoti a le Komiti o Tulafono Tumaui, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.69 & P.P.2021/2022 Nu.12, Lipoti Faaletausaga a le Penisione a le Palemene mo le Tausaga Faaletupe 2019/2020 & 2020/2021.
2. P.P.2023/2024 Nu.34, Tali a le Malo i le P.P.2022/2023 Nu.105, Lipoti a le Komiti o le Vaega Tau le Va Fealoai i le P.P.2022/2023 Nu.26, Lipoti Faaletausaga a le Faalapotopotoga o Tauai mo Faalavelave Faafuasei mo le Tausaga Faaletupe 2020/2021.

Ma le faaaloalo lau Afioga.

**TULAFONO TAU FAAOFI O TEUTEUGA O LE  
TULAFONO O LE FAAPUTUGATUPE MO LE LUMANAI  
MANUIA O TAGATA 2023-  
faitauga faalua – Aso Fono Lona 2**

**FOFOGA FETALAI:** E tolopo Taulumaga a le Fono Aoaofa Faitulafono i le aso Fono ananafi ua maea saunoaga a sui usufono mamalu i le Tulafono Tau Faaofi.

O le mea lea ou te tapa ai ma le faaaloalo lau Afioga i le Minisita e te saunoa talifuaitea i mataupu sa laga e sui usufono mamalu e faatatau i le Tulafono Tau Faaofi. Ma le agaga faaaloalo lau Afioga i le Minisita.

**Afioga Hon MULIPOLA ANAROSA ALE MOLIOO (Minisita o le Faaputugatupe mo le Lumanai Manuia o Tagata):** Faafetai i lau Afioga i le Fofoga Fetalai. E avea foi leni laolao matagofie ou te faatalofa atu ai i lau Afioga i le Fofoga Fetalai o le Maota aemaise ai foi le Afioga i le Tamaitai Palemia, le saofaiga a Minisita o le Kapeneta, aemaise ai foi le Taitai o le Itu Agai ma le tatou Maota Fono o le Palemene i le saofaiga a sui usufono o le Maota.

O se avanoa foi ou te faatalofa ma ofo alofa atu foi i le saofaiga a Ofisa Sili o Pulega o Matagaluega aemaise foi o Faalapotopotoga Tumaoti aemaise foi Samoa ua potopoto ma maua mai leni fesootaiga.

Ia, viia le Atua ona ua mafai ona faasopolia mai le soifua ma le ola o le Afioga i le Fofoga Fetalai aemaise foi le tatou Palemene i leni taeao fou. Foi le viiga i le Atua aua sa outou tofafa ma tatou momoe, sa tele le faailoga fesili pe mafai ona tatou aiga fesilafai i leni taeao fou. Ia ae viia le alofa ma le agalelei o le Atua o lea ua matau atu sulu o le tino, ua maualuga le aoina o le masina i le saofaiga a le tatou Maota o le Palemene foi le viiga i le Atua.

E pei ona tuua le tatou fonotaga ananafi ua oo mai le taimi e mafai ai foi ona avatu se laolao e tali ai foi nisi o faafesili, aemaise foi o le taaofaiga o leni Tulafono Tau Faaofi. E pei lava ona faalogologo ma le totoa i le taua foi o saunoaga ma fetalai. Ia atonu o i ina o lo o taoto ai le taiala o le lumanai manuia o Samoa, i le amanaia ma le ogatotonu o le tagata soifua, le taiala leni. E pei ona matauina foi i nisi o saunoaga ma fetalai, le mea o le taua o le amanaia. Atonu o i e ogatotonu ai le taiala o le lumanai manuia o Samoa, le amanaia o tatou tagata mai lava i le pepe meamea e tau i le tagata matua, aemaise ai foi tatou tagata o lo o i ai manaoga tumau.

O nisi o faafesili a le tatou Palemene, pe aisea le mea ua tufa ai le tatou tupe ae leai se Tulafono. Mo le silafia e pei ona faamanino foi i le aso ananafi, o lea lava na pasia le tatou Tala Faatatau o le Tupe 2021/2022, lena sa pasia ai ma vaegatupe o le disability po o ē e i ai manaoga tumau. Ina ua maea ona pasia le Tala o le Tupe, na faamatuu atu i le tatou Matagaluega o Tina ma Tamaitai e tuufaatasia se taiala e limataitaiina ai le faatinoga o leni

faamoemoe, ia ona tuu atu loa lea i le faamaoniga a le tatou Kapeneta, ia ona issue mai lea o le FK po o le pepa samasama e faatonu ai le Matagaluega e tuuina atu le faamanuiaga o tagata e i ai aafiaga tumau o le soifua. Ia ma faamanino ai le faasologa o lenei foi faatinoga.

O lea foi sa matauina sa tele ni saunoaga foi a le Maota o le Palemene fai mai e tuu mai le \$100 i le \$300, fai faapitoa se faleaiga e taumamafa ai ē e i ai manaoga tumau. Ia faatu se falemai faapitoa lava mo tatou tagata o lo o i ai manaoga tumau. Ia maua se penefiti o faamanuiaga e \$5,000 e pei ona faamanuiaina ai le tatou aufaisaofaga a le NPF. E taua tele nei lagona ma finagalo.

Peitai ane, a outou silasila i le tatou penisione, o le 1990 na amata ai le tatou penisione. Mo le silafia na amata i le \$50. E 5 tausaga e va ai faatoa oo i le \$60. E 33 tausaga faatoa oo i le \$200. O lona uiga, e faifaimalie. Ia manatua a tuu i le \$50 ae 5 tausaga e va ai faatoa sii i le \$60, lona uiga e tai \$10 i le tausaga, tai \$5, tai \$1. Lona uiga, e ese le taua o le tatou faifaimalie. Ae a outou faafofoga mai ia ma outou silasila foi i le tatou faamanuiaga lea, e \$100 e le \$50. Ia a o le taua, o lea ua i ai le amanaia o e o lo o i ai o latou manaoga tumau.

Ia, atonu foi o nisi foi o faafesili sa tuuina mai pe faapefea ona faatino nei tapenaga? Ia mo le silafia lava ia, o lo o galulue soosootauau le tatou Matagaluega o Tina ma Tamaitai ma le tatou Matagaluega o Tupe i le taimi lenei ae le i oo faamaumauga i le tatou Matagaluega o Tina ma Tamaitai, e i ai vaega ma faamaumauga e ao ona faatinoina e le o lo o i ai manaoga faapitoa, po o e foi o lo o tausia e o lo o i ai manaoga tumau. O lona uiga, e tatau ona i ai le tatou pepa mai le fomai ua mautinoa ma faamaonia ai ua i ai manaoga tumau, e i ai foi tatou pepa ID ma vaega uma e tuuina atu i le tatou Matagaluega o Tina ma Tamaitai, ia ona faatino lea o le latou iloiloga, ae le i tuuina aloaia i totonu o le resitala o e o lo o i ai manaoga tumau. A maea, ona tuu atu loa lea i le tatou Matagaluega o Tupe e faatino tiute ma matafaioi a le tatou Matagaluega o Tupe e faamatuu atu ai tatou tai \$100 ia i le masina. A o le auga la o le tatou Tulafono Tau Faaofi lea, ia faaofi i totonu o le system a le tatou NPF e pei ona faatino ai foi le tatou penisione.

Ia, e pei o vaega ia lau Afioga i le Fofoga Fetalai e ao ona faamanino atu, e pei ona sausaunoa ai foi le tele o tootoo foi ananafi e tusa ai o lenei foi Tulafono Tau Faaofi. Ma le faaaloalo.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2023 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloiloia ma toe lipoti mai i le Fono Aoao i se Fonotaga o lumanai.

## **ILOILOGA O LIPOTI A KOMITI FAA-PALEMENE MA TALI A LE MALO**

**FOFOGA FETALAI:** A o le i sagai atu le tatou Maota mo le iloiloga o Lipoti a Komiti Faa-Palemene ma Tali a le Malo, e ao ona ou toe faailoa nai vaega taua nei. Muamua, e ui o le tele o Lipoti Faaletausaga nei ua leva ona tuanai tausaga faaletupe e aofia ai, peitai o lo o manino le faamoemoe o le Tulafono Tumau 54 ma le 55, e tataua lava ona tagofia e le Palemene. O se tasi foi lea o matafaioi autu a le Palemene, o le mataituina o le Pulega Faatonu. O le agaga tonu lea o le i ai o le naunautaiga ina ia uia pea le faatinoga o le iloiloga o Lipoti a Komiti Faa-Palemene ma Tali a le Malo, ina ia mautinoa ma silafia ai e le Palemene le taunuuga o galuega faatino a le Pulega Faatonu e ala i Lipoti a Komiti ae faapea foi Tali a le Malo.

Lua, ia manatua foi o Tali a le Malo o le tali faaiua lea o so o se mataupu e fesiligia ai le Malo. O lena ua taulimaina e sui usufono mamalu Tali a le Malo ua leva ona tufatufaina atu. E i ai foi le talitonuga ua matua manino i o outou finagalo. E tusa ai foi o tatou faiga masani Faa-Palemene, e le mafai ona toe suia se Tali a le Malo ua tuuina mai aloaia i luma o le tatou Maota. O le Tali a le Malo, o le tali mulimuli lea o so o se mataupu. Ua tuuina atu i le Pepa o Galuega le faatulagaga o Lipoti a Komiti Faa-Palemene ua maea tuuina mai i ai Tali a le Malo. O lona uiga, o galuega ia ua tataua ona tagofia e le Palemene.

E i ai le manatu, a maea Taualumaga o le Tala Autu o le Tupe 2023/2024, e tataua ona faaauau le tatou Fono e faamaea galuega uma ia ua ou taua. E le faigofie le galuega sa feagai ma tatou Komiti. E tele le taimi sa faaalu ai, e tele foi vaegatupe sa faaalu mo le faatinoga o galuega a le Komiti. O lea ua lipoti mai e tataua foi ona tagofia e le Maota. O Lipoti Faaletausaga o lo o faagasolo nei le iloiloga, e le toe tau faailoa le mafuaaga o le faatua faataatia i le Maota. E ui i ia futia, ae tataua lava ona oo i ai le iloiloga a le Palemene. Mo le sologa lelei o le tatou galuega ma le faasaoina foi o le taimi, e talosagaina a outou Afioga i Taitaifono, e lelei ona faitau na o fautuaga o a outou Lipoti. E le o se tulitamoe o le tatou galuega ae ua leva ona tauaao e sui usufono mamalu kopi o Lipoti, ua mafatotoga foi i sailiiliga ma fautuaga a Komiti taitasi.

**P.P.2022/2023 NU.96, LIPOTI A LE KOMITI O TULAFONO  
TUMAU, MATAUPU TAU FAIGA PALOTA, TALOSAGA MA  
TOFIGA FAALE-FAAVAE I LE P.P.2020/2021 NU.118 &  
P.P.2021/2022 NU.45, LIPOTI FAALETAUSAGA A LE KOMISI O  
LE TOEFUATAIGA O TULAFONO A SAMOA MO TAUSAGA  
FAALETUPE 2019/2020 & 2020/2021**

**P.P.2022/2023 NU.174, TALIA LE MALO I LE P.P.2022/2023 NU.96, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2020/2021 NU.118 & P.P.2021/2022 NU.45, LIPOTI FAALETAUSAGA A LE KOMISI O LE TOEFUATAIGA O TULAFONO A SAMOA MO TAUSAGA FAALETUPE 2019/2020 & 2020/2021 – ILOILOGA**

**FOFOGA FETALAI:** Tulai mai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

**Afioga AUUAPAAU MULIPOLA ALOITAFUA MULIPOLA (Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae):** Lau Afioga a le Fofoga Fetalai, ou te faatu le lafo, *Ina ia faautagia e le Fono Aoa le Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Faleata 1 ma le sui usufono mo Gagaifomauga 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono mo le tolaulauina o Fautuaga ma Iugafono a le Komiti.

**Afioga AUUAPAAU MULIPOLA ALOITAFUA MULIPOLA:** Ou te manatu e ui lava ina pau le vaosa ae matau e tatala lava ona tapui mamala pe a sisiva mai tapuafanua o le fogatiasa. E manatu e faapena so matou avanoa ua e tatala mai i lenei Komiti.

Lau Afioga i le Fofoga Fetalai, e manatu o lea ua maea ona e vasevase le tafa e pei o upu e fai i le Tuamasaga, ina ua e faalelefulu ma ua fifimalie le ti'a o tavasaga i lenei taeao. E manatu foi lenei taaligoligoa ua le tatapola le agi a le toelau a ua agilaufola le tuafanua. Ma ua maea foi lau Afioga i le Fofoga Fetalai ona e lauvae manuula ua iloa foi le tai ina ua ali le maa taillesolo i lenei taeao. Faamalo le onosai i lau Afioga, ona e le faigofie le pale ma le folau, aua e fai foi o le pagiuato a o le pagituafoe. A o le soifuaga foi e taupe le tila e taupe foi le fagā.

Ou te tulai ma le ava tele lau Afioga i le Fofoga Fetalai e fai au ma sui o le matou Komiti e folasia atu ai taunuuga o matou sailiiliga, o fautuaga aemaise o la matou iugafono. Ona manatu lea o le a ulufale le gae ia se leo i le malutauee o le Maota Fono nei.

Ou te muai faatalofa atu foi lau Afioga i le Palemia ma lau Kapeneta i lenei taeao, Afioga i alii ma Minisita Lagolago, lau Afioga i le Taitai o le Itu Agai ma sui usufono mamalu uma o lenei Palemene.

Ou te faatulou foi i le Paia i Le Ao Mamalu o le Malo ma le Masiofo i le tapuaiga, Sui o le Fono o Sui Tofia ma lou Faletua, le Faamasino Sili ma le mamalu o le Ofisa o Faamasinoga.

E faafeiloai atu foi i le tapuaiga a Ofisa Sili o Pulega o Matagaluega o lo o tatou faatasi i lenei taeao ma Faalapotopotoga Tumaoti a le Malo ua mafai ona tatou faatasi.

E ao foi ona ou afea le tapuaiga mamalu a Samoa o lo o taputapu mai faiva o lenei Palemene. Le paia o Aiga ma latou tama, o Tama foi ma latou Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. O ou paia ia Samoa e le fia toliniu fitifiti i ai se isi, e leai foi se isi e fia ti'a tamusa i ai, aua o paia ua maea ona tosi lauti ma mamanu faatiti.

E faapea foi le tapuaiga mau a le afaigaluega tofofi a le Atua o lo o faafaletuluaia i so o se fatafaitaulaga. O mamalu ia e leai se tautai na te fia fagota sagolegole i ai aua o paia le popo o pa foi e le solo. E leai se lagona ae nuunuu atu ia faatini o tausala lo outou mamalu.

Lau Afioga i le Fofoga Fetalai o oototoga o saililiga a le Komiti lenei, e 2 Lipoti Faaletausaga sa tagofia e le Komiti mo le Ofisa o le Komisi o le Toefuataiga o Tulafono a Samoa sa iloilo. Sa faataatia i luga o le Laulau-a-Fono o le Fono Aoao i le aso 20 Ianuari 2021, ma le isi i le aso 15 o Fepuari 2022. O nei Lipoti o lo o lipoti mai faatinoga a le Komisi ma taunuuga o tausaga faaletupe 2019/2020 ma le tausaga 2020/2021.

O iugafono a le Komiti sa manatu ai ina ia iloilo faatasi nei tausaga faaletupe aua le manino ai o le eseese o galuega sa mafai ona faatinoina e le Ofisa, o tulaga na ausia aemaise foi o luitau sa feagai ma le Ofisa.

Lau Afioga i le Fofoga Fetalai, i le vaaiga aootele a le Komiti na matauina ai le sosolo o faatinoga a le Ofisa i lana Tulafono o le Komisi o le Toefuataiga o Tulafono 2028. O lo o aiaia ai e le Ofisa o le Komisi e nafa ma le suesueina ma le iloiloina o Vaega so o se Tulafono po o Tulafono Tau Faaofi ua manaomia ona toe teuteu pe faaleleia ina ia ogatasi ma tulaga ua i ai le soifuaga i lenei vaitaimi.

Lau Afioga i le Fofoga Fetalai o nei iloilo po o galuega faatino a le Ofisa e fua i luga o se talosaga ua tuuina mai e le Afioga i le Palemia, Kapeneta po o le Loia Sili, ma iloilo ua finagalo le Faatonu ma lona Ofisa e tataua ona faatino. I totonu o le tausaga faaletupe 2019/2020 sa matauina ai le maua o le fuainumera o galuega sa faatinoina, peitai sa faaititia i le 60% i le tausaga 2021 e mafua mai ona o le poloketi ua taua o le 'Fetuunai Muniao.' Sa ave i ai le faamuamua a le Ofisa ma ua auiliiliina e faapea;

**Galuega Faatino**

Iloilo a le Faatonu ma lona Ofisa

**2019/2020**

24

**2020/2021**

8

Suesuega Faapitoa	15	4
Galuega Tuuina mai le Palemia/Kapeneta	(9)	2
Galuega Tuuina mai e le Loia Sili	(3)	-
Isi	(3)	(2)

Sa matauina e le Komiti isi galuega o lo o taua o iloiloga ma suesuega sa faaaau mai isi tausaga faaletupe ae sa faamaeaina i tausaga faaletupe ua taua, sa iloiloina. Peitai o isi galuega o iloiloga fou sa mafai ona tuuina atu i totonu o tausaga faaletupe nei.

O se aotelega lau Afioga i le Fofoga Fetalai o ia galuega: Iloiloga o le Fefaasoaiga o Faamatalaga. Tulaga o Poloketi o lo o Fia Faamaeaina. Iloiloga o Tulafono o Komisi Suesue i le 1964. Iloiloga o le Tulafono o Komisi Suesue 1964. Iloiloga o le Tulafono o Faamasinoga 1961 ma le Lipoti Faaiu o le Puipuiga o Iloa Faaleaganuu Tuufaasolo a Samoa ma le Lipoti Faaiu o le Pulega o Measina a Samoa. Iloiloga o Tulafono o Mataupu Tau Aiga o Samoa. Tulafono o Tamaiti 1961. Tulafono o Faaipoipoga 1961. Tulafono o Mafuaaga o le Tatalaina o Faaipoipoga 1961. Tulafono mo le Tausiga ma Faamaoniaga o Tama 1967. Tulafono o le Saogalemu o Aiga 2013. Tulafono o le Faamasinoga mo Mataupu Faatatau i Aiga 2014.

O nisi nei o galuega fou lau Afioga i le Fofoga Fetalai na matauina sa faatinoina e le Matagaluega: Tulafono Tau Faaofi mo le Faatulafonoina o le Faasoasoina o Ata ma Faamatalaga Matuia i Luga o Upegatafailagi 2019. Tulafono o Taavale Feoai i Luga o Alatetele a Samoa. Tulafono o Auupega 1960. Iloiloga o le Tulafono o le Faaliliuina o Fanua Umia Saoloto 1972.

Poloketi Faapitoa o le Fetuunai Muniao, e pei ona i ai le Tulafono tau Faaofi o Teuteuga o le Faavae 2020. Tulafono Tau Faaofi o Fanua ma Suafa 2020 ma le Tulafono Tulafono Tau Faaofi o Faamasinoga 2020.

Lau Afioga i le Fofoga Fetalai, ona ou oo mai lea i nisi o Luitau sa matauina e le Komiti sa aafia i fuafuaga faataatitia aemaise o galuega faatino a le Ofisa:

1. Tuai ona aoina mai o faamatalaga talafeagai mo suesuega, e pei o mataupu faaletulafono ma faaiuga a le Faamasinoga e le o maua i le taimi o suesuega.
2. Faatumauina o le afaigaluega aemaise lava i le vaega o Tulafono e pei ona maua ai le aofai o le afaigaluega ua faamavae.
3. Le mafai ona tuuina mai i totonu o Tupe Faatatauina mo Tausaga Faaletupe na iloiloina se vaegatupe e totogi ai resitala i ni polokalame Faaletulafono (database – Lexis Nexis, NZlii ana Austlii) e faogaina i ana iloiloga ma suesuega.
4. Fausia o se auivi o faamaumauga tau Pulega e talafeagai ma manaoga o le Komisi.
5. Le mafai ona faataunuina o faatalanoaga autu mo le iloiloina o Tulafono o Mataupu Tau Aiga o Samoa.

Ona ou oo mai lea lau Afioga i itu matauina e le Komiti o le vaega lenei mo le silafia e le Maota, o lo o faavae ai fautuaga a le Komiti lenei.

Muamua lau Afioga, i le vaai a le Komiti, o le Ofisa aupito laitiiti lenei i Matagaluega uma ma Ofisa uma a le Malo. E na o le toa-16 i latou o lo o galulue a i lea taimi. E 9 avanoa faa-Loia ma le afaigaluega lagolago e na o le toa-7. Sa faamauina le talosaga a le Faatonu ma le Pulega i le Komiti ona o le manaoga e fia faaopoopo le afaigaluega aemaise lava i Loia. Na matauina e le Komiti sa i ai ni avanoa sikolasipi sa faatinoina mo le tomai faa-Loia peitai sa muta le faatinoina talu mai le tausaga 2013.

O lona lua lau Afioga, na maua e le Komiti e tele isi faatalatalanoaga a le Ofisa sa le i mafai ona faataunuaina, ma o le ala lea sa lape ai nisi o ana faatinoga i galuega. O le mafuaaga ona e na o le \$30,000 le vaegatupe e faatatauina i tausaga faaletupe e faatino ai lea vaega o ana iloiloga. E tusa ai o famaumauga, na o le 2 lava ni faatalanoaga na mafai ona faatinoina i le seleni lenei e \$30,000, o le tasi i le Fale o le TATTE ma le isi i Salafai ona saili lea e le Ofisa o ni fesoasoani mo nisi faatalanoaga.

Ona ou oo mai lea i le vaega mulimuli sa matauina e le Komiti lau Afioga i Lipoti a le Ofisa sa iloiloaina, e i ai nisi o faaletonu sa matauina ma e manaomia le silasila i ai o le Ofisa ina ia faaleleia ona o faaletonu nei sa matauina foi i Lipoti Faaletausaga a isi foi Matagaluega ma Ofisa sa iloiloaina e le Komiti.

O vaega la nei e aofia ai le le manino ma sao atoatoa faamatalaga e faaoga i le oototoga o galuega na faatino. E pei o fua faatatau o Taunuuga Fuafuaina o Galuega poo KPI's. O pasene ua fuaina i ai vaega sa ausia ma o le le lava o faamatalaga e faamanino ai ia vaega.

Lau Afioga a le Fofoga Fetalai ona taunuu mai lea i fautuaga lenei Komiti:

### **FAUTUAGA:**

I le faia i luga o ana Saililiga e fautuaina le Komiti o Tulafono Tumau lenei, Mataupu Tau Faiga Palota, Talosaga ma Tofiga Faale-Faavae le Malo ina ia:

#### **Fautuaga 1:**

Silasila i se faatulagaga po o se auivi e faaaogaina e faatino ai Lipoti Faaletausaga a le Ofisa ma Matagaluega uma a le Malo, aemaise o le Oototoga o Galuega Faatino i totonu o tausaga Faaletupe ina ia manino ma sa'o atoatoa. E manatu le Komiti o se tulaga e tatau ona tagatatutusa uma ai Lipoti Faaletausaga a Matagaluega ma Ofisa o le Malo ia le gata o auivi e faaaogaina, manino ma le sao o faamatalaga, faaaogaina o lanu e faailoa ai le tulaga o lo o iai le taunuuga o galuega sa fuafuaina pe ua ausia, faaauau, le i ausia foi, aemaise o le fuafua o le faaaogaina o pasene i luga sa faatinoina ai ina ia sao ma talafeagai ina ia atagia ai le taunuuga ua i ai.



### **Fautuaga 2:**

Silasila le Malo i se vaegatupe o tupe faatatauina o loo tuuina atu i le Ofisa e faatino ai ana faatalatalanoaga ina ia mautinoa o lo o lava, ina ia gafatia le faatinoina o ana faatalanoaga ma susesuega i Upolu ma Savaii aua se atoaga o ana iloiloga. E manatu le Komiti o se tasi lenei o mafuaaga sa faatuai ai ona faamaeaina nisi o ana iloiloga sa faatinoina, ona sa le i mafai ona faasolo a latou faatalatalanoaga i Nuu ma Afioga i tua e pei ona aiaia i ana matafaioi autu ma le Laasaga Faatino o le Toefuataiga o Tulafono.

### **Fautuaga 3:**

O le Fautuaga mulimuli lau Afioga i le Fofoga Fetalai: Silasila le Malo i le talosaga a le Komisi e ala i avanoa faigaluega ma avanoa faasikolasipi o lo o manaomia ina ia faaopoopo ai le afaigaluega galulue, o le siitia o le tomai ma le agavaa e faatino ai galuega. E manatu le Komiti lenei e tatau ma taua le lava o le afaigaluega ona ua matauina o le Ofisa aupito i laitiiti lenei i Ofisa ma Matagaluega a le Malo, ina ia foia ai le faaaitaui o le toagaogao o le afaigaluega ona o le toatele o i latou e faamavae.

I le mavaega mulimuli o le Lipoti a le Komiti lau Afioga, o le Iugafono e faapea:

### **Iugafono:**

E fautuaina e le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae le Fono Aoa ina ia faamaonia le, *P.P.2020/2021 Nu. 118, Lipoti Faaletausaga a le Komisi o le Toefuataiga o Tulafono a Samoa 2019/2020 ma le P.P.2021/2022 Nu.45, Lipoti Faaletausaga a le Komisi o le Toefuataiga o Tulafono a Samoa 2020/2021.*

Ua maea atu lea o se matou tala, ia alofagia e le Atua lau Afioga i le Fofoga Fetalai, lau Afioga i le Tamaitai Palemia ma le Kapeneta ma le mamalu o lenei Palemene. Ia i ai foi Lona agalelei i nisi o sui usufono mamalu o le Maota ua le mafai ona tatou mafuta i lenei aso ona o tuatuagia le maalofia aemaise foi o gasegase o le tino.

Tau ia ina ia faamanuia le Atua i le faafofoga tapuai mai a Samoa le atunuu pele, nei ma so o se tafa o lenei lalolagi. Manuia lau Afioga i le Fofoga Fetalai mo lo matou avanoa. Manuia le Fono a le atunuu, faafetai.

**FOFOGA FETALAI:** Faamalo faafetai i lau Afioga i le Taitaifono o le Komiti, malo lava mo le tolaulauga o Fautuaga.

Ou te tapa lau Afioga i le Tamaitai Minisita o le Komisi o le Toefuataiga o Tulafono a Samoa mo le tolaulauina o Tali a le Malo i le Fautuaga a le

Komiti e pei ona tolaulau e le Afioga i le Taitaifono. Lau Afioga i le Tamaitai Minisita.

**Tofa MATAMUA SEUMANU VASATI SILI PULUFANA (Minisita o Faamasinoga ma Pulega Tau Faamasinoga):** Lau Afioga i le Fofoga Fetalai, ou te tolaulauina Tali a le Malo e faatatau i Fautuaga a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae e pei ona folasia manino nei e le Taitaifono. Atonu o lea ua manino Fautuaga a le Komiti Faa-Palemene e uiga i lea mataupu, ae o Tali nei a le Malo e faatatau i Fautuaga.

**Tali:**

Ua faamauina e le Komisi o le Toefuataiga o Tulafono a Samoa le Fautuaga a le Komiti mamalu, ma o le a talia se finagalo mai Ofisa Tutotonu o le Malo e i ai le Matagaluega o Tupe, Komisi o Galuega a le Malo, ma le Matagaluega a le Palemia ma le Kapeneta e latou te taimua i lea fuafuaga taua. O le a fiafia lava le Komisi e mulimulitaia se faatulagaga e faataoto ma fautuaina mai e nei Ofisa Tutotonu a le Malo, ina ia faataunuuna ai le faamoemoe autu o le Fautuaga a le Komiti.

O le faatulagaga o loo faaaogaina e le Komisi i le taimi nei e lipotia ai Fua Faatatau o ana Galuega Faatino, o se faatulagaga tuai o loo mulimulitaia e le Komisi e pei ona faaaogaina i ana Lipoti Faaletausaga ua tuana'i. O se talitonuga faatauva'a o le Komisi, o le tuusao ma manino o le faailoaina o galuega faatino, e atagia ai le gasologa sao o Fua Faatatau o Galuega Faatino pe ua ausia, faaauauina, po o le le maea pe le i ausia foi. Peitai, e fiafia lava le Komisi e tausisia ma mulimulitaia o se faatualagaga fou e faamaite ma faataoto mai e Ofisa Tutotonu ma faamaonia e Pulega talafeagai.

Tali mo le Fautuaga 2:-

**Tali 2:**

Ua matua talia lelei e le Komisi lenei Fautuaga i le agaga faafetai ma le fiafia tele ina ia mautinoa o lo o lava vaegatupe faatatauina mo faatalanoaga faalauaitete. O faatalanoaga faalauaitete ma le atunuu ma paaga o se laasaga taua tele o le faagasologa o le Toefuataiga o Tulafono a le Komisi ona o se auala lea mo tagatanuu o Samoa e fai ai lo latou sao i le Toefuataiga o ana Tulafono Toe Iloilo.

O le faamoemoe autu o le faatinoina o faatalanoaga faalauaitete ma le atunuu ma paaga, o le sailia lea o finagalo ma manatu faaalua o i latou uma o lo o aafia i Tulafono o lo o iloiloaina. E taua tele i le Komisi le

aoina mai ma tuufaatasia nei finagalo faaalua ona e tele lo latou sao i le tuufaatasia o ana Fautuaga faaii mo le Toefuataiga o Tulafono i le Malo ma le Palemene.

E pei ona silafia i nai tausaga ua mavae atu, na faamanuiaiina ai le Komisi i le tauaaoina o ni fesoasoani tau seleni mai paaga i atunuu mamao e pei o le Sisters for Change ma le Polokalame a le UNDP o le Spotlight Initiative, e patino tonu lava i lana iloiloga o Tulafono o Mataupu Tau Aiga o Samoa. O nei fesoasoani na maea aloaia i tausaga faaletupe 2021/2022 ma le 2022/2023. E lagona ai lava lava le agaga faafetai ona sa faapea foi ona maea le Iloiloina o Tulafono o Mataupu Tau Aiga a Samoa i totonu o taimi faatulagaina o nei fesoasoani tau seleni.

E pei ona silafia, o fesoasoani tau seleni na faamatuu mai nei paaga e 2, na fesoasoani tele i le faatinoina o polokalame faalauiloa, aemaise o faatalanoaga faalauaitele ma le atunuu ma paaga i totonu o le atunuu atoa mo le Iloiloina o Tulafono o Mataupu Tau Aiga a Samoa.

O le vaegatupe faatatauina e \$30,000 e masani ona faamatuu mai lalo o le Tala Faatatau o Tupe a le Komisi, e le taitai ona gafatia ai le faatupeina o faatalanoaga faalauaitele, ina ia mautinoa o finagalo faaalua e aoina mai, ua aofia ai le atunuu atoa ma ia faatuatuaina. Ua maea foi ona faaalua e le Komisi leni atugaluga i fonotaga taualoa aloaia e aofia ai le Kapeneta mamalu, o le iloiloina o Tala Faatatau o Tupe mo le Matagaluega o Tupe, faatasi ai ma Komiti Faa-Palemene.

Sa tuuina atu foi le talosaga aloaia a le Komisi i le Matagaluega o Tupe mo le faamatuuina mai o vaegatupe faasao mai le polokalame o le Sisters for Change e \$36,436.00, e fesoasoani i le faatupeina o le faatinoga o faatalanoaga faalauaitele ma le atunuu ma paaga mo le iloiloina o Tulafono o Taavale Afi a Samoa, o lea sa faatinoina ia Me oo mai i le masina nei.

E le gata i lea, a ua tuuina atu foi i le Tala Faatatau o Tupe Fuafuaina mo le Tausaga Faaletupe 2023/2024, le talosaga a le Komisi e siitia ai i le \$73,000 vaegatupe faatatauina e faatupe ai faatalanoaga faalauaitele ma le atunuu ma paaga, mo ana iloiloga o Tulafono o lo o faagasolo. E ui lava o le aofaiga ua talosagaina e le o lava pe a fua i le aofaiga e moomia ina ia mautinoa e faasopolia le atunuu atoa i le aoina mai o finagalo faaalua, peitai o loo vaavaai foi le Komisi i le tulaga pagatia o le tamaoaiga o atunuu ma le lalolagi o lo o iai nei, ona o le tulaga lamatia o le tamaoaiga e le mafai ona o tatou pulea.

O le tele o faatalanoaga faalauaitete i poloketi o le Toefuataiga o Tulafono ua tuanai atu e faasopolia ai le atunuu atoa, sa faatupeina lava e fesoasoani mai paaga. O lo o atagia ai o le vaegatupe o lo o faatatauina i le Tala Faatatau o Tupe mo faatalanoaga faalauaitete, e le o lava e faasopolia ai Samoa atoa. O le tulaga anoa ma le lelei o Fautuaga a le Komisi e le gata e faalagolago i ana suesuega ma iloiloga tutoatasi, ae sili ai ona taua finagalo faaalua o tagata o lo o aafia i iloiloga taitasi.

O le vaega mulimuli mo le agai i le lumanai, i le leai ai o ni fesoasoani mai paaga mo so o se poloketi o iloiloga a le Komisi o lo o faagasolo, o le faatupeina o faatalanoaga faalauaitete ma le atunuu ma paaga, o le a faalagolago atoa i vaegatupe avanoa i lalo o Tala Faatatau o Tupe a le Komisi.

### **Tali 3:**

O se faafitauli umi lea o feagai pea ma le Komisi, ona e le gata ina leai se vaega o Loia o avanoa e faatumuina avanoa faigaluega Loia, ae na taofia foi avanoa sikolasipi mo Faailoga o le Tulafono (Law Degrees) talu mai le 2013.

Ua maea ona faaleoina lenei atugaluga e le Komisi i fonotaga taualoa maualuluga eseese e aafia ai le fonotaga a le Kapeneta mamalu, le Matagaluga o Tupe i le taimi o iloiloga o le Tala Faatatau o Tupe aemaise ai o le Komiti Faa-Palemene.

O loo tulimataia pea ma mataitu e le Komisi se taimi e toe tatalaina ai avanoa faasikolasipi mo fanau e aoaoina ai Faailoga o le Tulafono (Bachelor of Law), ina ia mafai ai ona maua ni Loia e avanoa i nai tausaga o lumanai e faatumuina avanoa faa-Loia i totonu o le Komisi.

O lo o tapenaina e le Komisi se talosaga aloaia e tuuina atu i le Komisi o Galuega a le Malo e talosagaina ai le toe tatalaina mai o le taofia o avanoa faigaluega (recruitment freeze). Ina ia mafai ai ona toe faaauau le faasalalauina o avanoa faigaluega e 5 i totonu o le vaega o Tulafono (Legal Division) ma le naunautaiga o le a i ai nisi sui agavaa e tusi talosaga mai i ai.

Ia ma lo'u faaaloalo lava lau Afioga i le Fofoga Fetalai.

**FOFOGA FETALAI:** Malo faafetai. Faafetai i lau Afioga i le Tamaitai Minisita mo le tolaulauina manino o Tali a le tatou Malo. Ua faafofoga le tatou Maota i le Lipoti a le Komiti e pei ona tolaulauina e le Afioga i le

Taitaifono faapea foi Tali manino a le Malo i Fautuaga o le Komiti e pei ona tolaulauina e le Afioga i le Tamaitai Minisita.

Ia, o le avanoa leni mo se tasi o sui usufono e fia saunoa i le tatou Lipoti. O le fautuaga a le Nofoa ia agai sao pea i le tatou Lipoti ma o lea foi ua uma ona tuuina atu fautuaga a le Nofoa, o lea foi ua uma ona tali tatou Malo, ua leva ona foi ona taatitia i luga o a outou laulau le tatou Lipoti.

Ia o le avanoa leni mo se tasi o se sui usufono mamalu o le Maota. Ia, se i tulai mai le sui usufono mo Aleipata Itupa i Luga.

**Afioga FUAAVA SULUIMALO AMATAGA:** Ia, leni taeao e momoli atu le faafetai i lau Afioga i le Fofoga o le Maota mo le avanoa. E faafeiloai aloaia atu foi i le paia o le Maota Fono nei, i le afio o le Afioga i le Tamaitai Palemia ma le Afioga i le Sui Palemia ma le Vasega o le Kapeneta, aemaise foi Minisita Lagolago. Ia, liliu mai foi i leni Itu i le afio atu o le Taitai o le matou Vaega aemaise foi o le mamalu o sui usufono uma o le Maota.

E faafeiloai atu foi i le paia o Ofisa Sili o Pulega o Matagaluega ma Faalapotopotoga a le Malo, aemaise foi le aufaigaluega a le Maota Fono i le Failautusi ma lona Sui Failautusi ma le mamalu o le aufaigaluega.

Ia, e talitonu leni taeao o lea ua tatou faamua le viiga i le Atua i Lana taitaiga, aemaise foi o Lona agalelei ma Lona alofa ua tatou aulia leni aso Fono. O lea foi e faafogafoga le atunuu, ia, tau ina faapai atu ai e faafeiloai le faafofogaaga a Samoa mai lava i mauga tetele seia paia alo ma fanau, aemaise foi le faafofoga a si ou itumalo.

Ae o le taumafaiga atu i le Lipoti pei ona i lumamea nei, ia, i le matagaluega lea o le Toefuataiga o Tulafono. E i ai le manatu o lea e pei e lua tausaga lea e talanoaina, o le tausaga faaletupe 2019/2020 ma le 2020/2021, lea e aumai faatasi ai Fautuaga e pei ona folasia e le Taitaifono aemaise foi o Tali a le Malo e pei ona aumai e le saunoaga manino a le Minisita.

Ia, e talitonu foi e fai si maotua o tausaga o le Lipoti, ma e vaavaai atu foi i ai, ia, e taua lava Fautuaga na aumai le Komiti, o lea foi e manino Tali a le Malo, ma e fia faaleoina foi la le lagolago a leni itumalo i Fautuaga ma Tali foi ua aumai.

Ia o le tulaga lava ia e agai lava i luma le tulaga o le tatou galuega. O a foi ni fesuaiga o lea ua fautuaina e le Komiti, aemaise o le tulaga lea pei ona aumai ai le tali i le tau leai o ni tagata faigaluega, aemaise lava i latou o i ai faailoga o le Tulafono, law degrees. E toatele loia sa i ai, ae ou te iloa o le toatele o isi ua agai i tua ma fai latou lava ia Ofisa Faa-Loia, private practice foi lele, ia o le sailiiliga manuia lava. Ia atonu o se isi o mafuaaga o le tulaga tau totogi i te i ua le lava le faasoia ma tulaga, ia pei ua agai la nisi i tua e fai le Ofisa Loia, atonu e tele ai foi clients po o tagata e agai atu i latou mataupu tau le Tulafono ia ma fesoasoani foi i le tausiga o aiga aemaise foi o le seleni maua ma tulaga uma faapea.

O le tulaga pei ona aumai ai le fautuaga i le toe tatalaina lea o avanoa sikolasipi, ia e auai ai foi le manatu o lenei itumalo, ona o lea ua tele... ou te iloa foi o le taotele o loia ua agai foi nisi i fafo, ma ou te iloa foi o le tatou Matagaluega lea po o le Faalapotopotoga lea lea na toatele lava nisi ua faamavae, aemaise foi o le Faauluuluga lea na faamavae talu ai nei foi. Ou te iloa e tatau lava ona i ai nisi e toe lalago mai aemaise le tulaga lea e faaauau pea sikolasipi ia lava tatou loia, aua o lea e vaai atu e toa-5 avanoa faa-loia o lea e le o mafai ona faatumuina. Ia atonu ua gaogao le maketi o loia po ua le lava foi loia, a o se mea e tatau ona fai ma ia i ai foi ni nai incentives e faaosofia ai foi loia e apalai mai i avanoa nei. Ia pei ona avatu se faamatalaga, e i ai lava mafuaaga e faamavae ai tagata mai ofisa. O lo o i ai foi lava le silafia ma le personal reason lava ia o le tagata i le tulaga ua faamavae ai, a o se fautuaga, e le o se mea foi ta te nofonofono loa ai ae taumafai loa ina ia faalava mai lava avanoa ia sikolasipi ina ia toatele ai nisi o alo ma fanau e faatutumu avanoa nei.

O le tulaga tau i seleni, ia, e taua le tulaga lea, aua o lea ou te vaai atu pei na o le \$30,000 sa assign, a o lea e taumafai po ua oo i luga i le \$70,000 + e assign ai i le Paketi, e faaoga lea i le faiga o faatalatalanoaga. O le isi core function lea a le tatou Faalapotopotoga lea, o le saililiga o finagalo, ia lava le database e fai ai le latou assessment, po o fea e mafuli i ai finagalo o le atunuu, po o fea foi o lo o i ai ni faamaumauga, evidence ma mea uma faapea, e iloa ai ona talafeagai ona lauliliu se Tulafono, faafou se Tulafono. Aua o le tele o isi Tulafono nei, ia o le vaitaimi e le i tutoatasi Samoa. O nisi foi o Tulafono ou te iloa o le faatoa tutoatasi lea o Samoa i le 1960. Ia ma o le taimi foi la lea, sa fai lava Tulafono foi i le fuata o lena taimi, lea ua oo mai i le talutalufou i le tatou vaitaimi, ia ou te iloa foi ua talafeagai le lava o le seleni e faamatuu atu i le tatou Ofisa lea ina ia faagasolo lava o latou tiute fai, ia lava le faamaumauga e aumai. O le tele o se faamaumauga, tele se database e base ai le latou assessment, ou te iloa foi o le talafeagai lea ma le lava foi lea o le mea e fuafua i ai le fetuunaiga o le lauliliuina o le Tulafono. Pe i ai ni mea e toese ua le o toe tutusa ma lenei taimi, ia pe i ai foi ni mea fou e tatau ona faaopoopo, aua lava le agai o Samoa i le lumanai, ia aua ai ne i o tatou motu ese ma le mea o lo o agai i ai le lalolagi, aua e i ai tulaga faapena e tele lava le tatou fesootaiga. Ne i te i ua fai atu tatou Tulafono pei na o totonu lava o Samoa ae i ai foi tulaga foi lele i le fetuunaiga lea ia taumafai e faauouo lelei ma isi foi atunuu e faigofie ai ona maua mai nai seleni ma fesoasoani.

Ua maua i le Lipoti, pau lea o le vaega pei sa fesoasoani tele i le tulaga tau tupe. Lau Afioga i le Fofoga Fetalai o lea e maua ai o a foi igoa o Faalapotopotoga ia lea e pei o ni brothers and sisters foi lele i mea tau Tulafono lea na aumai ai seleni ma e tele la le fesoasoani i le aufaigaluega i le faatinoga o latou tiute. Ia ma o se tulaga foi e fautuaina e le usugafono a lenei itumalo, le faaauau pea o lea tulaga i faigapaaga ia. Aua ou te iloa e ui

e laitiiti le tupe e assign atu i lalo o le tatou Tala Faatatau o le Tupe, e fesoasoani i le faatinoga ma atoatoa tapenaga a le Ofisa, a ia faaauau pea tulaga ia o faigapaaga ia ma nisi o Faalapotopotoga i fafo, aemaise foi o nisi o atunuu e maua mai ai le seleni lea e faaleleia atili. Aua ou te iloa o le tele o Faalapotopotoga lea e maua mai ai fesoasoani ia o vaega foi lava pei o le latou matafaioi e tutusa lava foi ma le matafaioi o lo o faatino nei e le tatou Faalapotopotoga lea, i le silasila lea i Tulafono, o lona talafeagai ia ma lona le talafeagai foi e tusa ai foi ma le talutalufou ma lenei vaitaimi o le soifuaga ua i ai si o tatou atunuu.

Ma e fautuaina lava le tulaga lea e faaauau, faaauau faigapaaga nei, e le iloa pe alu alu lava e oo atu foi i se miliona se isi fesoasoani e auina mai i se taimi lata mai ma tulaga uma faapea, ae aua ai ne i i ai le tulaga foi lele e uma ane ua papau lava le tagata a le tatou Matagaluega, toe le a'ua'u foi le tatou faasoa e alu atu i totonu o le Tala o le Tupe, ia ona i ai lea o le tulaga lea ua le faasopolia le taumafaiga a le aufaigaluega ina ia soo le tatou atunuu, maua uma finagalo o afioaga ma itumalo taitasi aua le lauliliuina o Tulafono pei ona latou taumafai e faatino, ia o le latou galuega faifaipea, aua e leai lava ni Tulafono e tumau e oo i le faavavau. E i ai lava Tulafono e tai tausaga lava ma sui o le mea e talafeagai ona ua sui foi le fuata ua sui atu ai ma le lou, ia pe a faapea lava o le mea ua tatau ma talafeagai.

Ia ou te iloa lau Afioga i le Fofoga Fetalai, na pau lea o nai manatu vaivai mai lenei itumalo e tusa ai ma le Lipoti, ae faafetai i le Komiti, faafetai foi i le tali mai a le Afioga i le Minisita. Ia manuia le Fonousu a Samoa.

**FOFOGA FETALAI:** Faafetai. Malo faafetai, malo saunoa i lau Afioga i le sui usufono mamalu.

Oi ia, se i tulai mai le sui usufono tamaitai mai o i le tatou itu i Savaii, Alataua Sisifo.

**Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai – Alataua Sisifo):** Ia, e faatalofa atu i lau Afioga i le Fofoga Fetalai faapea foi le Afioga i le Palemia ma le Kapeneta, o Minisita Lagolago, o sui usufono uma o le Palemene aemaise foi Samoa ua faatasi mai. E le gata i lea o Samoa o lo o faafofoga tapuai mai.

Ou te tulai atu e fai foi se sao o lenei itujmalo i le Lipoti tau aua folasia a le Komiti o Tulafono Tumau. E faataua le fautuaga muamua lea i le faia o se auivi lea e faatino ai Lipoti Faaletausaga, e le gata o le Ofisa lea, a o lea ua taafai uma mai ai ma Lipoti Faaletausaga a Matagaluega uma a le Malo, ona o le tulaga lea ina ia manino, e tatau ona amata mai i le Tala Faatatau o le Tupe, ia manino a latou galuega po o workplan o fuafua o le a fai i lenei tausaga. A oo foi la ina lipoti mai i le tausaga o lumanai ua maea le tausaga faaletupe, o i ina la e tatau ona fua i ai po o a galuega na mafai ona faatino.

O le aoga ma le taua o le fautuaga, ina ia fesootai tonu lava ma fuafuaga alualumamao le PDS a le Malo lea ua uma ona faataatia, ia ma toe link atu ai i luga i SDGs po o Sustainable Development Goals a le lalolagi pei ona galulue uma i ai atunuu taitasi. O le taua lea ona e tele lava ina feeseeseai solo tulaga o le lipoti mai, ae a maoti le tulaga lea, ua tatou iloa tonu lava po o a galuega na fuafua e ausia, a o a foi mea ua mafai ona ausia ma iloa ai mea la e totoe ina ia uma ae lava lea Paeaiga ma lea Paeaiga ua iloa tonu lava po o a mea na mafai ona ausia i tulaga ia i galuega a le aufaigaluega a le Malo. E lagolagoina ai lea tulaga.

O le tulaga taua lea na tau ai le Fautuaga Lona 3, o le leai lea o ni loia. E le na o le Ofisa lea o lo o i ai le faafitauli. E talitonu e pito i sili atu ona aafia le Ofisa o Loia lea e 22 a latou avanoa foi e le o mafai ona faatumuina, ona o le leai o ni loia. Ou te le mailoa i ai po o le a le mea na ala ai ona taofi avanoa sikolasipi i le 2013. O le mea sa tau faalogologo mai a o i tua, e pei o le toatele tele o avanoa ma fanau sa o atu ma faamanuiaina mai i lona vaitau i le faalogologo mai tua i leitio na ala ai ona le toe ave pe ua na o le taitasi avanoa sikolasipi pe toalua. Ia o lea la ua lagolagoina ai tele le tulaga lea, ia toe ave ni avanoa. A tau amata atu i sina 10, leaga ua tele tele le gap, ua matua tele lava o le gap lea e i ai i totonu o le Malo ona o lea ua tatou iloa lava e tele tupe e maua i tua, a o i la lea e feed atu ai tua, aua e aua uma lava galuega mo le tautuaina o le Malo.

Ia, o le talosaga lea e toe lagolagoina ai le tulaga lea, ia tatau lava ona amata i isi sikolasipi ia o le a amata ona ave avanoa sikolasipi se i feed mai le tatou vaega lea ua leai nisi. Ia ma le agaga faaaloalo o se manatu lea o lenei itumalo.

**FOFOGA FETALAI:** Malo faafetai mo le fautuaga matagofie aua foi le agai i luma o lea foi matata taua o le tatou Malo. Malo faafetai mo saunoaga.

Ia talu ai o lea ua tatou taunuu i le tatou taimi malolo o le taeao, ia ona o le aso foi lenei o le aso e vave manava ai foi le tatou galuega, o lea foi la ua sui mai le tatou taimi malolo.

O le mea lea, o le a faataatiaese Galuega o le Fono Aoa mo lana malologa masani o le taeao.

*Na faataatiaese Taulumaga a le Fono Aoa Faitulafono mo lana malologa masani o le taeao i le itula e 10:30 i le taeao ma toe faaauau i le itula e 11:04 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono.



I le taliu mai ai o le tatou malologa, e i ai le manatu ua maua se faasiligamalosi ina ua maea le tauteaga ma le taligasua i le paia o le tatou Maota.

E le faaitiitia lava le faafetai i le Atua ona o ana faamanuiaga e ala i Lana foai, aua le tausiga faaauau o le tatou Maota.

E faataatiaese a tatou Taulumaga mo le malologa o le taeao ua maea le saunoaga a le sui usufono Tamaitai mo Alataua Sisifo, ae o lo o taumafai mai le sui usufono mo Vaimauga 1, mo se avanoa e saunoa ai. Ia o le avanoa lenei mo le sui usufono mamalu mai Vaimauga 1.

**Afioga SULAMANAIA FETAIAI TAUILIILI TUIVASA (Vaimauga 1):** E momoli le agaga faafetai i lau Afioga i le Fofoga Fetalai e tusa ai foi ma le taligasua foi a le Maota sa saunia e lou Ofisa i lenei taeao. E momoli ai le agaga faafetai, ua maea foi ona paleauau le taliga o le sua. Ae le mafai ona tuua foi e lenei itumalo le taua o le Lipoti Faaletausaga a lenei foi Matagaluega, ua lumamea nei.

E momoli ai le agaga faafetai i le Afioga i le Taitaifono aemaise foi o le Komiti mamalu sa talanoaina ma tuuina mai i totonu o le Fonotaga le Lipoti Faapitoa a le Matagaluega a le Komisi o le Toefuataiga o le Tulafono 2019/2020 ma le 2020/2021. E momoli le agaga faafetai ona o se Lipoti i tulaga ua tuana'i.

O le agaga faafetai muamua o lenei itumalo, a silasila lava i le tele o atinae sa faatinoina e lenei vaega a le tatou Malo, e faavae ai foi lenei Matagaluega e fesoasoani ai foi i si o tatou atunuu, aemaise o le tele o Tulafono ua mafai ona toe sui ma toe matimati. E momoli ai le agaga faafetai.

E avea foi lenei itula e faafetai faapitoa ai i le sa taiulu foi i lenei vaega foi o le Matagaluega a le Malo, ma i latou o lo o galulue ai pea. Ia malo le tautua. O le agaga fiafia o lenei itumalo, a silasila lava i le Lipoti ua tuuina mai, o lo o faavae ai se tulaga sa faasao mai ni seleni, o le agaga faafetai lena. Ae a matau lava i le seleni na faamatu i ai e \$30,000, ae sau le tulaga sa faasaoaina mai, e pei e agaga faapena. O lea foi ua tatalo i ni tupe e toe faamatu i ai. A o le agaga fiafia lava o lou sui usufono, o le le faamaumuina o seleni, i lenei foi auaunaga sa galulue ai nei tupu ma tamalii. A tau foi i le tele o poloketi foi sa faatinoina e i latou, e pei ona i ai le mea lea o le Fetuunai o Muniao, aemaise foi o nai fesoasoani sa tuuina mai fafo. E i ai le Sister for Change, e ala foi i le polokalame a le UNDP lea e i ai le Spotlight ea po o le a ea. E momoli ai le lagona faafetai, e le o tagisa lava lenei foi vaega i le tatou Malo, o lea lava e aumai i fafo fesoasoani. Ae lagolagoina e lenei itumalo le talosaga i le tele o le manaomia i loia e le gata i lenei Matagaluega ae o nisi o Matagaluega a le Malo. E tau avatu ai se manatu o lenei itumalo, ona o latou lea e toe iloiloina Tulafono.

O lea e tatalo atu ai i le Minisita aemaise foi o le Kapeneta ma latou o.... ona o lea e need lava loia ia e foi mai ma faailoga degree ma mea faapena.

Ae pe le manaomia ai mo mea o loia Samoa foi na e leai ni faailoga. O tama foi na e se i tulou lava, e lava le tulaga o le aganuu i totonu o affioaga o nuu ma alalafaga, aemaise foi o nai faifeau malolo manumalo, aua le toe suiga o Tulafono. E i ai foi Tulafono i totonu o le Land and Title ma mea faapena i Faamasinoga, ona o lea e tagisa lava i loia ia e omai i le tulaga faapena. Ae o loia ia e i totonu o le atunuu i le aganuu ma mea faapena, pe le mafai ona o atu e faaoga i totonu, i ni totogi... e le ausia le tulaga o loia, ae faaoga ai a tatou loia ia e... e i ai le aganuu ma le tamaoaiga. Ae a silasila lava i sui o lenei Komiti, e matau atu lenei usugafono, o lauia lava sui ia e i ai. Ae matau atu i le lipoti i le amataga....

**Tofa Hon Olo Fiti Afoa Vaai:** Lau Afioga i le Fofoga Fetalai....

**FOFOGA FETALAI:** Ia malie le sui usufono mamalu se i tuu atu le avanoa i le Afioga i le Minisita o Galuega Tetele.

**Tofa Hon Olo Fiti Afoa Vaai:** Lau afioga ona o lea ua faalua sui a le Itu Agai o laga le mataupu lea o le leai o ni loia, ma ua tuuitiitia foi loia, e sao. O le tele ia o galuega o lo o tuuina atu i le Matagaluega a le Loia Sili i le taimi lenei ua fai lava si tuai ona ua utiuti le aufaigaluega ua utiuti loia. Ae ina ne i matau mai ma faafogafoga mai le atunuu, o se mea na taofiofi e le Itu lenei ma le Faigamalo lenei.

O lea ou te manatua nai tausaga ua tea, na fai ai e i ina, a o saofafai atu le tatou Faigamalo lenei i nei, na taofiofi ai lea o mea ia o le toe avatua o sikolasipi i loia. Na leotele ai lava le Taitai o le Itu Agai a o Sui Palemia i lenei taimi. O lea e pei e foliga mai ua toe sa'i mai le Taitai o le Itu Agai, e tauala mai i a outou afioga i sui mamalu, a o ia lava lea sa matuai tetele, e aua ne i toe avea ni sikolasipi i loia. O le mea lenei mo le faafogafoga a le atunuu, e leai e le o se mea na mafua atu i i, o le mea na mafua mai i ina.

O le mea la lea lau Afioga i le Fofoga Fetalai, na ou fautua foi i ai i le taimi lenei o fonotaga na i le mea lea. Ua ou fii e fautua a o Sui Palemia le Taitai o le Itu Agai, na te le talia. O le mea la lea e iloa ai, o lea ua iloa i le aso, e fai lava si mamao o lau tilotilo i le taimi lenei, ae puupuu le silasila a le Taitai o le Itu Agai.

**Tofa Hon Laufo Fonotoe Nuafesili Pierre Laufo:** Lau Afioga i le Fofoga Fetalai e....

**FOFOGA FETALAI:** Ia, e leaga o lea ua taua le suafa o le Taitai o le Itu Agai. Ia se i saunoa, e ui lava o lea e te i totonu o le Komiti e le tataua ona faaalua sou finagalo ae o le a tuu atu o lea ua taua lou suafa.

**Tofa Hon Laufo Fonotoe Nuafesili Pierre Laufo:** Ioe, o le mea lava foi lele, ua safua fua le maaveave le fua, ae leai lava se mea tele o tupu i lenei mea. O le taofiga o sikolasipi loia i lenei vaiata, pe ua 7 i le 8 tausaga talu ai, o le mafuaaga, ua faataoto atu ia fuainumera a le Ofisa o Sikolasipi o tagata sikolasipi ma outou alo ma matou fanau sa aoga i fafo, o le la ua lava ma tofoe loia i lenei vaiata. E le gata ua 50 ea loia sa i totonu o le Ofisa o le Loia Sili, ae ua tofoe foi Matagaluega ma loia. O le mea lava lenei, e le o se tala avane ai. O faaiuga na, sa fai tonu lava i le vaiataimi a o saofafai Laauli ma Fiamme i totonu o le Kapeneta, a o au ia sa ou nofo atu i i, i le itu lea. Ioe, o faaiuga la na sa fai, fetuunaiaga o faiga faavae mo le agai i luma. Ma e i ai le isi mea na tupu i le vaiata lenei, o lea ou te tau manatua. Ua matau atu le Faigamalo ma silasila atu foi i le tulaga ua taoto ai le aoina o fanau i totonu o le atunuu, ua fai lava si pau i lalo o le tatou vaega foi lea o le Matematika ma le Saienisi. O lea la na toe fetuunai ai faiga faavae, e tau taofiofi le isi vaega lea, ae ave avanoa sikolasipi... aua e le lava ni tatou tupe e sikolasipi uma ai fanau. Na ave loa la le faamuamua ma le faataua, sikolasipi mo alo foi ia e o, e sue le Matematika ma le Saienisi. O lea la se i tau aumai i luga lenei foi tomai i totonu o le tatou atunuu, aua e taua tele aemaise lava atunuu tau atinae, e pei ona i ai si o tatou atunuu laitiiti, e taua tele ia polokalame ia.

O le mafuaaga lenei na taofia mai ai loia, sikolasipi loia i na foi vaiata, ae sa fai lava isi mau aoga mo aoga foi ia, i isi faailoga mauualalo ifo i le Paeauga na tea nei, pe 20 sui usufono na o aoga ai i le USP, maua uma ai o latou faailoga na, na maua ai foi ma le faailoga o Sulamanaia ea sa aoga ai, ia ma Loau ma isi mau faipule sa i ai, maua o latou mea na o le Certificate of Civil Law.

E pei o tulaga na e faamalamalama ai le vaega lea. Faafetai.

**FOFOGA FETALAI:** Ia, o lea ua maua atu, o lea ua manino. Ia tulai mai ona o lea ua taua le suafa o le Minisita, le Afioga i le Minisita o Faatoaga.

**Susuga Hon Laauli Leuatea Polataivao Fosi:** Ia faafetai. O le a ou le agai i o leaga e sese. Ae o le a ou agai sao i le saunoaga a le sui usufono mamalu. Ua ou fiafia lava i le taeao lenei ua ou faalogo atu ua agai mai le sui usufono o Vaimauga e toe faatuputeleina loia. Ae ua ou manatua lava le mataupu tuga foi lea sa tulai ai le asosi o loia, e omai e momoli mai le mau, e tetee i pili e 3 lea na tatou vevesi ai foi. Ioe. Na ou maua lelei le tulaga i le taimi... O le sui lea, na matuai tuga lava ana upu na fai i le mau a loia na omai, e le natia. Na laulau ai le leai o se tofa, le papau o le vaai ma le tilotilo, po o ai latou, e fesiligia ai le Lipoti a le Komiti lea na agai i pili e 3.

O le tulaga fiafia la ia te au i le taeao lenei, o lea ua ou faalogologo atu, ua toe agai mai e toe faaopoopo loia. O le mea lea na saunoa i ai le Taitai o le Itu Agai, ia e tasi lenei sese, e sese, sese, sese tele lava. Na ala ona faatulai le

aveese o nisi avanoa mo loia i le atunuu, ona o le le fiafia o le sa avea ma Palemia i le asosi o loia. O le mea sao lava lena. Na matuai tuga ai le sa avea ma Palemia o Samoa, i le le fiafia ma lalau ai lava nai loia e fia popoto, leai se tofa, na fai uma na mea i le asosi o loia, tipi ai loa i ina ma avanoa. Ma o le mea sao lena na tupu. A o se upu i le taua o le ma i ai ma Fiamē i le taimi tonu lena, Fonotoe, that was the time was a one party state. Remember. E leai ma se isi o tatou e fai se upu. Aisea? E pule toatasi, o le mea lava e fai mai e fai, fai. Ia ua a nei la? Ia o lea ua alu alu, lea ua sioki loia. Ona o le mafuaaga lena, was a personal agenda, e le fiafia i loia a le atunuu. Ua a nei la? Ua le iloa e Su'a le mea o le a fai, ua leai ni loia. Ua tu atu lava lea loia alu. Aisea? Leaga totogi. E matou te tau mai nei, e le taitai auau totogi, ioe, o le ala lena ua ou manatu ua tatau ona faamalamalama, leaga o lea e faafogafoga mai le atunuu. O lea e sao Olo, ua pei ua augani mai nei, e agai mai e faapea mai o lea ua faapea mai o lea ua sioki loia ona talutalu o lenei Itu.

**Afioga Alaiasa Moefaauouo Malagaitutogiai:** Lau afioga i le Fofoga Fetalai onao lea ua afea le Taitai o lenei Itu...

**FOFOGA FETALAI:** Ia se i maea le saunoaga a le Minisita ona tuu atu lea o le avanoa i lau afioga.

**Susuga Hon Laauli Leuatea Polataivao Fosi:** E leai, e pau lava lea ia manino ma malamalama i le mafuaaga ua sioki ai loia. Na taofi ona o le mafuaaga lena. Ua le fiafia i le saunoa mai o loia e faasao, e faasao le mataupu na tatou talanoa ai i pili ia e tolu. Ua a nei la pili e 3?

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, e fai foi o le faasao mai, ae o le faasao atu....

**Susuga Hon Laauli Leuatea Polataivao Fosi:** O lea e tau togafiti.... Ma le agaga faaaloalo.

**Tofa Hon Lauofo Fonotoe Nuafesili Pierre Lauofo:** Aua ne'i galo, leaga e galo i lau afioga.

**Susuga Hon Laauli Leuatea Polataivao Fosi:** O lea e le i avatua le avanoa, o lea ou te avatu...

**Tofa Hon Lauofo Fonotoe Nuafesili Pierre Lauofo:** O ai na tusiaina ia pili ia e tolu?

**Susuga Hon Laauli Leuatea Polataivao Fosi:** O lea ou te avatua...

**Tofa Hon Lauofo Fonotoe Nuafesili Pierre Lauofo:** O loia, o loia na tusia pili ia e te saunoa mai ai... O le a le mea ua e toe saunoa mai ai i le tetee a loia? E faafefea la ona fai?

**FOFOGA FETALAI:** Ou te faamalulu atu...

**Susuga Hon Laauli Leuatea Polataivao Fosi:** E le avea fua le...

**Tofa Hon Lauofo Fonotoe Nuafesili Pierre:** E tusi e loia toe tetee e loia, ae faafefea ona fai?

**Susuga Hon Laauli Leuatea Polataivao Fosi:** E le avea fua le vaivai o loia e taofia le...

**FOFOGA FETALAI:** Lau Afioga i le Taitai o le Itu Agai...

**Tofa Hon Lauofo Fonotoe Nuafesili Pierre:** O lau saunoaga lea e le fetau ma e sese. E sese lau saunoaga.

**FOFOGA FETALAI:** Ia se i maea le saunoaga a le Minisita ona toe tuu atu lea o le avanoa.

**Tofa Hon Lauofo Fonotoe Nuafesili Pierre:** O le a aafia fua i latou e le o i totonu o le Maota.

**Susuga Hon Laauli Leuatea Polataivao Fosi:** O le faalavelave lea o lou soli Fono.

**FOFOGA FETALAI:** Ia o lea ua maua atu, ia alaala mai i lalo se i faauma pea le saunoaga a le Malo, ona tuu atu foi lea o le avanoa.

**Susuga Hon Laauli Leuatea Polataivao Fosi:** O le a le saunoaga a le...

**Tofa Hon Lauofo Fonotoe Nuafesili Pierre Lauofo:** O lea ua uma...

**Susuga Hon Laauli Leuatea Polataivao Fosi:** O le upu lea lau afioga i le Fofoga Fetalai leaga o lea ua tatou talanoa i le mataupu lea. O le a le saunoaga a le ua avea nei ma Peresetene o Faamasinoga? The Law was badly drafted.

**Tofa Hon Lauofo Fonotoe Nuafesili Pierre Lauofo:** Ia silasila la lau Afioga i le mea lea?

**Susuga Hon Laauli Leuatea Polataivao Fosi:** O ai la na faia? Tali mai, o ai na faia? Ia o le uiga lena o lau tala...

**Tofa Hon Lauofo Fonotoe Nuafesili Pierre Lauofo:** O lea o le a fai atu lau fautuaga ia oe, aua e te faaogaina le Parliamentary Privilege e tau ai le Peresetene o la e faafofoga mai le Peresetene.

**Susuga Hon Laauli Leuatea Polataivao Fosi:** Ia o le upu lena na fai. E sese le upu na fai?

**Tofa Hon Lauofo Fonotoe Nuafesili Pierre Lauofo:** Aua le lotea i latou o la e galulue i le Faamasinoga i le taimi lenei.

**FOFOGA FETALAI:** Ou te faamalulu atu, ou te faamalulu atu i lau Afioga i le Minisita lau Afioga i le Taitai o le Itu Agai...

**Susuga Hon Laauli Leuatea Polataivao Fosi:** E sese le upu na fai?

**Tofa Hon Lauofo Fonotoe Nuafesili Pierre Lauofo:** Ou te le fai atu e sese, ae le tatau ona taua i totonu o le Maota lenei. Ia fesili ae i le Sui Palemia lena e i ou autafa o le isi foi loa, po o sao au mea na e fai mai.

**Susuga Hon Laauli Leuatea Polataivao Fosi:** Lau Afioga i le Fofoga Fetalai...

**FOFOGA FETALAI:** Ia malilie le tatou Maota, ua manatu foi le Nofoa o le a faagata ai i i lea mataupu ona e mautinoa ai o le a tatou vevesi ai i le tulaga lea. Ma e i ai foi le faaeteetega o le Nofoa, o le tatou toe tepa ai i tua ia ma faaumiumi ai le tatou galuega o lea ua sologa manuia le tatou galuega. O le mea lea, ia malie lau Afioga i le Minisita.

**Susuga Hon Laauli Leuatea Polataivao Fosi:** E faamalulu atu, na ona ou tulai atu lava e asuasua atu malu i puega. Afai ua laaloa se manatu i tua, e le o ni upu e tau afifi, leaga na saunoa le Peresetene ia Samoa atoa. Ae faamalulu atu pe afai ua laaloa, ona o le naunau e faasao la mea ia ua aumai, leaga o lea ua tau le pua ma lafo mai. Ia manuia le Fono lau Afioga i le Fofoga Fetalai.

**FOFOGA FETALAI:** Faafetai. O lea ua maua atu. O tatou lava ia o taitai o le atunuu, ia mau pea le toovae ma toatoa pea a tatou saunoaga aua lava le filemu o le Maota. Ia, e manatu, ia se i tulai mai Lufilufi po o se mea e toafilemu ai le tatou Maota.

**Afioga Alaiasa Moefaauouo Malagaitutogiai Sepulona Moananu:** Ioe, o au ia ou te vaai lava i le toafilemu o le tatou Maota. E pei o le ala lea na ou tulai atu ai, ona ua afea fua nisi foi e le o mafai ona tali mai pei o tatou Tulafono Tumau i le saunoaga a le Minisita, ia a o lea lava e ataata Olo e ona foi si tamai ata lea na tatou tau vevesi ai nei i le tulaga foi o le aumaiga o le mataupu. Ae ia te au ia i loia ma so o se faalapotopotoga e le gata i loia a o so o se faalapotopotoga lava, e politicise loa e tagata le mea lea, leaga loa. E fiu lava la e toe faasao, leaga o la e sau ma le agenda e ese lona mafaufau la e i ai.

Ia ma le faaaloalo.

**FOFOGA FETALAI:** Malo faafetai. Ia ou te talitonu o lea ua toamalie foi ia matapu ma felafolafoaiga, ia atonu o lea foi ua fesoasoani mai Lufilufi. Ia o le agaga lena ina ia faafaigofie ai pea le tatou galuega ma maua pea le filemu ma le toamalie, a o faagasolo pea a tatou tualumaga.

O le mea lea lau Afioga i le sui usufono mamalu mo Vaimauga 1, ia, o lou avanoa lea e faamaea mai lau saunoaga.

**Afioga Hon Loau Solamalemalo Keneti Sio (Sagaga 1):** Lau Afioga pe maua se avanoa e...

**FOFOGA FETALAI:** O le avanoa i fea le sui usufono mamalu? O le agai i o i le sui usufono lea e saunoa?

**Afioga Hon Loau Solamalemalo Keneti Sio:** Ia e fesoasoani aua leaga o au le isi sui o le Komiti.

**FOFOGA FETALAI:** Oi o le isi sui o le Komiti?

**Afioga Hon Loau Solamalemalo Keneti Sio:** O lea la e ala ai ona ou tulai atu, e agai i le saunoaga faamalamalama a...

**FOFOGA FETALAI:** Ia saunoa le sui usufono mamalu.

**Afioga Hon Loau Solamalemalo Keneti Sio:** O le mea muamua lava lau Afioga, o lo o agai i le Ofisa, e tasi lava le Ofisa o le tatou Malo la e agai i ai le Lipoti e pei ona taumafai mai le matou Taitaifono. Ioe. A o le le lava, o le mumusu lava o loia latou, a o lo o fau le loia i totonu o le tatou atunuu, ioe. O isi loia la e feofeoi solo o la e avepasi isi loia, a o le le fia o lava e faigaluega i le Matagaluega. A o loia ia e matua fau le loia i totonu o le tatou atunuu. Ia ma le faaaloalo.

**FOFOGA FETALAI:** Ia masalo o lea ua maua mai e le sui usufono mamalu. Ia, faaauau le saunoaga.

**Afioga SULAMANAIA FETAIAI TAUILIILI TUIVASA:** Masalo lau Afioga i le Fofoga Fetalai e tatau foi i lenei taeao, ua lagalaga foi manatu ona o le lauga a lenei tumalo, ae i ai lava le manatu so o se mea lelei lava e faapena ona feei ma amanaia le taua o le lauga a lenei itumalo, leaga o lea ua afaina nai loia. Ua saunoa foi le Minisita o Faatoaga i se tala foi a lenei sui usufono sa ave i totonu. Ia e manumanu lava i tatou faatalatalanoaga lea i totonu, ae leai, a omai lava le aufaigaluega foi a le Malo, o tatou o taitai, e ave lava le tatou tuualalo ma ave i ai i tulaga i faatalatalanoaga o Tulafono Tau Faaofi. Ae a silasila foi i le tuuaiga lenei ua i ai i lenei taeao, ia o le Tulafono lea o Fanua ma Suafa o le 2020 lea na faatoa pasia ai, a o loia lea na talanoa atu ai o le 2013 na taofia ai faamanuiaga ia, e mamao lava. Sa taofia le tulaga lea i faamanuiaga o la e ta te matamata mai fafo.

A o le tulaga lava o le taeao lenei, e sao ai Lufilufi. O le tagata lea o la e ua faamanuia e le Atua ua alu atu i ina a o la e fai faa-Itu Agai lava, o le Minisita lea o Olo, o ia lava lea sa tatau ona aua ne i faailoa mai ae musumusu ia Laauli sa latou i ai i le vaitaimi lena. A o le loia foi lea e talanoa ai le sui usufono o le Vaimauga, se i tulou lava e o lo o i ai le agavaa....

**Tofa Hon Olo Fiti Afoa Vaai:** Lau Afioga i le Fofoga Fetalai.

**Afioga SULAMANAIA FETAIAI TAUILIILI TUIVASA:** E i ai isi loia foi na e e mafai ona e tausami...

**FOFOGA FETALAI:** Ia malie le sui usufono mamalu, leaga o lea ua taua le suafa o le Minisita, o le uiga foi lea o tatou Tulafono Tumau ia faataumamao foi le taua o suafa o...

Ia saunoa lau Afioga i le Minisita.

**Tofa Hon Olo Fiti Afoa Vaai:** Leai, e... i si ou ou uso a sui usufono. E leai na pau lava le lagona na ou tulai ai, ona e fai si matuia o le tulaga lea ua aliali faapea ua leai ni loia ona tuuaia lea o le tatou Malo i le tulaga lea. O lea la sa tau faapulapula atu i si ou uso a sui usufono, e leai o le mea ua leva ona mafua mai i lena itu a o seei atu foi i inei. Ia tatou fetagofi lea e fai faatasi, toe faatele tatou loia. Ua malie lau Afioga i le sui usufono?

**FOFOGA FETALAI:** Ou te iloa ua manino lea mataupu. E pei foi ona saunoa le sui usufono tamaitai mai le Alataua Sisifo, e manino lava o le 2013 lea sa taofia ai ona o nisi o mafuaga. Ia atonu o lea ua manino lea vaega. E fautuaina foi e le Nofoa, ia tatou taumamao ese ma ia tulaga o lea ua tuanai ia futia, ae tatou mafaufau mo le agai i luma.



Ia saunoa Afioga i le sui usufono mamalu.

**Afioga SULAMANAIA FETAIAI TAUILIILI TUIVASA:** O le loia lea sa talanoa ai le sui usufono o le Vaimauga ona a faapea ua sioki loia e i ai faailoga, lea la sa ou talanoa i mea o tatou auaunaga i matai i totonu o afioaga ma ekalesia foi i nai faifeau foi, tulou, e omai e fesoasoani i tulaga faapena e faafaufautua. Ia matauina foi lau Afioga i le Fofoga Fetalai e i ai le isi ituaiga loia, tulou le Maota, e te tausami tausami lava i se mea lololo e faalogo atu ua e loia. O le loia la lena e leai se faailoga, a o lea e i ai le tomai i le faatinoga la o mea ia... ou te le o talanoa i...

**FOFOGA FETALAI:** Ou te fautuaina le sui usufono mamalu ia tasi lea matafaioi ma tiute tauave o nisi o le mamalu o le atunuu ia tatou foi o taitai o le atunuu, ia ona tatou saunoa ia tapue ma ia faamamaluina, leaga o le suafa foi o se tasi o matafaioi a le atunuu. O le mea lea, ia e fautuaina le sui usufono mamalu ia agai sao pea i le... E taua pea lou finagalo i le fautua a le aumatutua, ia ae o le oooo i tulaga ia, o lea ua fautua atu le Nofoa.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai e faaauau se manatu, o le Matagaluega lena e tatau ona i ai nisi Tulafono ina ia aumai i le Maota e punitia ai le va ma le tulaga lea o le AG po o le Ofisa o le Loia Sili, ia aua ne i feteenai auaunaga, aua e le o po se lilo pei sa tasi uma lava latou i lalo o le faamalu lea o le... Ae o le tatalo a lena itumalo mo le agai i luma, ina ia mafai ona faamatuu lava le auaunaga ia ia i latou i ni Tulafono e faatino ai lava e latou ni a latou auaunaga e aunoa ma le aafia atu pei o lea e tau maua mai le Lipoti, e i ai nisi tulaga o lo o tau punitia ai le auaunaga ma le malosiaga o lo o faatino lava e latou ia i le Tulafono Toefuataiga ia Tulafono a le tatou atunuu.

Lau Afioga i le Fofoga Fetalai, na pau lena o manatu e avatu e lena itumalo. A paopapa foi se leo o le Vaimauga, ia, pei o le agaga lena, aua ne i milia faauu upu a le tatou Maota. Pe avatu e le lelei pe a, ia toe faafoi mai. A avatu e aoga, ia pei ona ta fai atu, e lelei lava le sae ifo o le tatou sa a o la e tatou te i ai uma.

Ia manuia lena weekend i lau Afioga i le Fofoga Fetalai aemaise foi o le Afioga i le Palemia ma le Kapeneta, aemaise foi lena Itu i lau Afioga i le Taitai ma sui usufono mamalu o le Palemene, ae matou maloloina i le alofa ma le agalelei o le Atua.

**FOFOGA FETALAI:** Malo faafetai saunoa. Ia se i tulai mai le sui usufono mamalu mai Anoamaa 1.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Faafetai mo le Lipoti lau Afioga. O le a agai

sao lava se faamatalaga i le Taitaifono. Ia, o le tausaga ia 2019/2020, 2020/2021, ia pei o lea sa iinei i lenei itu le taitaiga o le Malo. Ia o lea e agai mai e lelei mea uma, leai se mea na faaletonu.

Afai foi o faasaoina ni tupe, leaga o lea e aumai le fautuaga o le 2022 ma le 2023 na fai ai le galuega, ae manatua foi o le taimi ia o le Koviti sa tau leai ni galuega sa fai ma loka le mea ua leai ni... ia afai lava la sa sioki le Ofisa, ia o le taimi lena sa faaletonu ai, a o lea ua tataua ona foia lena faaifitauli ina ua tulai mai.

O le mea lea, tasi lea mea sa taua, ina ua fou nei le tatou Tulafono lea o le PBA, Public Bodies Act lea na faamaonia ai loa, ave loa i Matagaluega e tofua ma le loa, ae tuuifitia le Ofisa o le tatou Attorney General, tasi lea auala na ala ai ona faamatuu atu loa, a o lea la ua toe manaomia, toe manaomia nisi o tatou loa. A o lea ua ou vaai i ai ua faamavae le foma'i lea sa taitaia le tatou galuega lea, a o se tagata agavaa, ae sa sau foi si teine i le matou Komiti sa fai, ia ae inaina i ai loa faataitai lea e i ai matou ma... Ae le iloa po o le tasi lea mea ua musua ai foi sia alo o le atunuu. Ia a omai foi nai loa i le tatou Palemene, ia fai faalelei nai loa. Ae i ai le agaga o le a faaleleia atili lea itutino aua le iloiloga o tatou Tulafono.

Ia alofa mai le Atua i le tatou fonotaga i lenei foi aso, ia faapena ona i ai le agalelei i lau Afioga ma le paia o le Tamaitai Palemia ma le Kapeneta. Ia faapea foi lea Itu i le Taitai ma lenei Itu toagaogao. Ia soifua ma ia manuia.

**FOFOGA FETALAI:** Malo faafetai. Ia malo lava i le sui usufono lea, short and sweet. Manaia, malo lava saunoa.

Ia se i tulai mai lau Afioga i le Tamaitai Palemia.

**Afioga Hon Fiamē Naomi Mataafa (Palemia):** Ia faafetai lava i lau Afioga i le Fofoga Fetalai. Sa leai se manatu e fai se tala e uiga i le tatou mataupu o lo o i le Laulau-a-Fono. Ae peitai, o lea lava e mataituina po o le a tonu le fatu ma le aano o lo o momoli mai e le Lipoti, ia faapea foi ona talitua'itau le Afioga i le Minisita.

E matau atu o le mataupu autu o le lava po o le lava o tatou loa. Na o lou fia faapoopo atu i le tulaga o lea e silafia e le Maota, o lo o faagasolo nei le galuega a le Komisi e Pulega le Afaigaluega a le Malo e toe auiliili matafaioi ma galuega patino a tatou Matagaluega eseese. E le taumate e silasila ai foi i le tofiaina o loa.

O nisi o itu e matauina i le mataupu lea, e sao ai foi se isi o taofi ua faaalia, o le matuai tele lava o loa i totonu o le atunuu. Pe i ai mafuaaga ua le mafai ai ona lava loa i totonu o itutino o le Malo, pei o le Ofisa o le Toefuataiga o Tulafono le Law Reform, ma le tatou Ofisa o le Loa Sili. E matauina i le faagasolo mai o le tatou faigamalo ma le tapenaina o tatou loa, o le tatou Ofisa o le Loa Sili, sa ala mai ai le tele o tatou loa sa aoaoina mo le faamoemoe.

O le uiga o lau faamatalaga, e i ai la le tupulaga lea o loia, ua avea le galulue i totonu o le Ofisa o le Loia Sili ua latou silafia ai le tiute ma le matafaioi faa-loia e lagolago ai galuega faale-Malo, pei o le isi foi faaopoopoga lea o le latou aotauina i tomai e manaomia. Ona alu alu ai lea i le tulaga lautele o tatou sikolasipi foi nei a foi mai e galulue mo le Malo, ia ua matauina foi, ua le lava galuega a le Malo mo latou e foi mai, ona tatala atu lea i tua, e mafai ona galulue, a ia galulue i Samoa e faatino ai le latou bond.

E toe tatai mai la lau faamatalaga i loia mo le Malo, e i ai le isi mea lea ua aliali mai i le faamatuu atu o loia i tua i Matagaluega, ae iu lava, po o a lava tapenaga a loia a Matagaluega, e toe foi uma mai lava i i le Ofisa o le Loia Sili. Ae afai foi ua tauave lava e le Matagaluega ia se mataupu faale-Tulafono, ia, e i ai lape ua tulai mai e fai ma faataitaiga, o le tauaveina e loia o le Matagaluega o Tiute ma Lafoga, lafoga foi ia a faifeau, a ua le tapa le Ofisa o le Loia Sili. Na o se faataitaiga.

Ia, o mea uma ia, e taua foi le silafia e le Maota. E matau atu foi matou i le itu o le Pulega Faatonu, po o fea le mea e tatau ona tata i ai, aemaise ia mautu mai faamaumauga aemaise faamaumauga a le Malo, ma o lea o lo o talia le galuega a le PSC, ia atonu o le a maua mai se isi ata tau manino, e le gata o vaega uma o le auaunaga, ae silasila totoa foi la i ai i le mataupu lea ua laga i le Lipoti a le Komiti i le tatou mataupu lea o lo o i ai nei i le Laulau-a-Fono.

Mulimuli ane lau Afioga i le Fofoga Fetalai, ia e tatalo atu pea i le tatou Maota, o taga lava ia o polokiki, ua matauina foi le siisii, lafo mai na fai i le taimi o ai, lafo atu o le taimi o lena. E le o le itu lena e taua, tatai mai outou finagalo po o le a le mataupu lea e feagai ma tatou i le tatou taimi lenei, a o le a se tatou fofu e fai agai i ai. Ma le faaaloalo lava lau Afioga.

**FOFOGA FETALAI:** Malo saunoa i lau Afioga i le Taitai o le Malo po o le Taitai foi o le Maota. Faafetai lava mo le tofa faaalia, atonu o lea ua maua tonu mai lava e le faafofogaaga a le Maota le agaga foi o le Nofoa ia fapena foi ona tatou agaigai agai i luma ma tatou mataitu mea e ao ona ave i ai le tatou faamuamua i lenei vaitaimi.

O le mea lea faafetai i le saunoaga a lau Afioga, o lea foi ua manino mea uma e tusa o le tatou mataupu e pei ona i ai. E oo foi i le mataupu tau loia, atonu o lea ua saunoa manino le Taitai o le Malo i fuafuaga agai i luma aua tulaga tau loia. Ia ou te talitonu foi ua manino lea mataupu i le faafofoga mai a le Maota.

Ia, ua i ai le manatu, lafo atu ia i lau Afioga i le Taitaifono se i faamaea mai nisi foi o mataupu sa lagalaga, a o lea ua manino atoatoa le saunoaga a le Palemia, ia o lea ua taaofai uma ai lagona o le Maota. Lau Afioga i le Taitaifono.

**Afioga AUUAPAAU MULIPOLA ALOITAFUA MULIPOLA:**  
Faamalo faafetai i lau Afioga i le Fofoga Fetalai. Ia, e faamalo atu foi i le Maota. E moni lava upu o le atunuu e pau lava le moana ona o ona gafa. Faamalo le pati ma le taupale. Ae ua tulai se i sui tonu le mata o le niu, ne i meaane foi se niu e tino i le niu ae sua i samilolo pei o aga a le Palemene i lenei taeao e tusa o le Lipoti. A o finagalo faaalua uma lava o le Maota, ia e talia lava ma le agaga faafetai e au nei le Taitaifono o lenei Komiti. Ae masalo foi le aotelega lea ua saunoa i ai le Afioga i le Tamaitai Palemia, ia na ona ou fia fonofaapipii e tusa ai o finagalo faaalua o sui usufono.

O le finagalo o Aleipata Itupa i Luga, e faafetai i lou lagolagoina o le Lipoti a le Komiti. Ia o tulaga uma lava na e pei foi o lou fautua mai e uiga i le seleni e \$30,000 lea sa faamatu ai ma le agaga o le faaogaina o le seleni ona o le faatalatalanoaga, aemaise lava se Tulafono o fufou e draft pe tusia ma implement e tuuina mai i le Maota mo le pasiaina. Ia o lea ua aumai lau fautuaga, o lea foi ua taua i totonu o le fautuaga faale-Komiti ina ia siitia le seleni mo auaunaga a le Komisi o Galuega o le Toefuataiga o Tulafono. Faafetai mo fautuaga ua tuuina mai.

Ia, saunoa foi le sui usufono ina ia faaauau pea faigapaaga pei ona i ai foi nisi Samaria Agalelei e pei o le Sisters for Change. Ia o le agaga lava lena e tasi ia i tatou, tatou te galulue foi ma tatou faigapaaga o lo o i ai le agaga e fesoasoani mai i so o se aualea e atiae ai le tatou tamaoaga.

I le sui usufono tamaitai mo Alataua Sisifo, e faamauiina ma le agaga faafetai. O le itu foi sa asa i ai le Komiti ina ia tuuina mai faamaumaga mo le lipotiina mai o galuega faatino po o KPIs, Key Performance Indicators ina ia atagia lelei ai le faatulagaga mai o aiiaiga o galuega o le a fuafua e ausia, ia ae pe o ni galuega foi e le i ausia le taiala, ma le achievement sa fuafua i ai. Ia faafetai mo le fautuaga, ae o tulaga na sa asa uma i ai ma fautuaina e le Komiti, e le gata o le Komisi o le Toefuataiga o Tulafono, ia a o le fautuaga foi lea a le Komiti i itutino a le Malo ma ana Matagaluega e oo mai i luma o lenei Komiti, ia o le alafua lava lena e tuu ai ana fautuaga. Ae faafetai mo le fautuaga, ua faamauiina o le a matou sosolo ai lava mo le agai i luma o lenei Komiti.

O le fautuaga ma le finagalo o le sui usufono mo Vaimauga 1, ia e masalo pe aiga lava ma sui usufono ua ou taua foi i le amataga. Ae i le naunautaiga faapea o lo o i ai ni loia e i ai ni o latou tomai faaleaganuu, tomai faa-matai tausiaiga, tausimea, matai faiupu i le nuu ma ua taua foi le aufaigaluega tofofi a le Atua e fia faigaluega i totonu o le Matagaluega lea, ia e manino lava faiga faavae a le Komiti, e oo mai loa le Tulafono i luma o le Komiti, ia e tuu lava le avanoa i le tatou atunuu e talaaao mai luma o le Komiti e faaali so latou finagalo. O lona uiga, o lo o i ai le avanoa, e le o ponatia le avanoa lea, po o ai lava a o a foi tofiga o lo o galulue ai lo tatou atunuu, e tatala lava le avanoa i le Komiti e faaali ai lou finagalo. E pei o le tulaga lea,

e le o ponatia le tulaga lea i le tuuina atu e le Komiti i le atunuu e faaali o latou finagalo.

Ia o fautuaga foi a le sui usufono mo Anoamaa 1 e faapea o le tuuina atu o loia i public bodies foi lea o lo o i ai le Public Bodies Act, ia o le tulaga lena lea ua matou matauina, masalo e vasaga ma le finagalo o le Afioga i le Tamaitai Palemia lea ua faamanino atu. A i ai outou alo ma a tatou fanau o lo o malaga i fafo e saili tomai faa-loia ae omai ua leai ni avanoa ona ua faatumulia le Ofisa o Loia, e mafai la ona tufa i le Matagaluega lea e serve ai le latou bond foi lele e 2 ea tausaga. Ae i ai lava le agaga e fesootei mai le Ofisa o le Loia. Aua po o le a lava Tulafono tatou te fofou e faufau ma fuafua mo le lelei o le atunuu, e tasi lava le faafitiga o aleaga e oo mai i i le Ofisa o le Loia Sili. Ae faafetai mo fautuaga.

Ia, e manatu au nei ma le Komiti, ia o lea ua taaofai finagalo o le Taitai o le Malo i tulaga uma ia pei ona i ai faafesili e uiga i le Lipoti a le Taitaifono. Ia e avanoa foi lenei avanoa e avatu ai le faafetai i le mamalu o sui usufono o lenei Komiti, malo lava faafetai i la outou galuega, malo foi i le tatou Palemene le tapuai. Malo i lau Afioga i le Fofoga Fetalai mo lo matou avanoa. Manuia le Fonousu a lenei atunuu, manuia le alo atu i le faaiuga o lenei vaiaso. Soifua ma ia manuia.

**FOFOGA FETALAI:** Malo faafetai. Ia, lau Afioga i le Tamaitai Minisita, pe i ai se mea e te fia saunoa ai.

**Tofa Hon MATAMUA SEUMANU VASATI SILI PULUFANA:** Lau Afioga i le Fofoga Fetalai, ou te manatu o lea ua maea paepae ma folasia upu o lenei aso ma lenei taeao, aemaise o le Pepa a lenei Ofisa. E momoli atu le faafetai tele i le Taitaifono, atonu o lena ua tali mai uma e le Taitaifono mataupu ma mea uma sa laga, po o fautuaga foi. E momoli atu le faafetai tele i le Taitaifono ma le Komiti ona o tali mai aua le faaleleia atili o le auaunaga a lenei Ofisa. E moni a au, o le Ofisa pito toaitiiti lea i Matagaluega ma Ofisa uma o le Malo. Faafetai le fesoasoani mai. Faafetai foi i le Afioga i le Palemia mo le faamalamalamaina atili o nisi o vala e pei ona sa i ai.

E momoli foi lefaafetai i le paia ma le mamalu o le Palemene. Ou te le i mafaufau e manaia faapea ni feupuaiga, ni felafolafoaiga i le Pepa a lenei Matagaluega, ae faafetai ua atili malamalama ai foi.

Ia, e le faamatafauloaina se faamatalaga, agalelei le Alii i lau Afioga i le Fofoga Fetalai aua le Maota Fono o Samoa, musuia e le Atua manatu ma se tofa i le Taitai o le Malo ma le saofaiga mamalu a Minisita o le Kapeneta. Maua foi se finagalo lagolago o le Taitai o le Itu Agai ma sui usufono o lena Itu. Ia tala soifua le amataga o le vaiaso fou aua galuega fai a le Palemene, ae manuia tele le fonotaga. Soifua ma ia manuia.

**FOFOGA FETALAI:** Malo faafetai i lau Afioga i le Minisita e tusa ai foi o saunoaga faamalosiua ma faalaeiau aua lava le... e le gat ai le Komiti a o le tatou Maota.

Ou te tapa lau Afioga i le Taitaifono mo le lafo.

**Afioga AUUAPAAU MULIPOLA ALOITAFUA MULIPOLA:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le P.P.2022/2023 Nu.96, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.118 & P.P.2021/2022 Nu.45, Lipoti Faaletausaga a le Komisi o le Toefuataiga o Tulafono a Samoa mo Tausaga Faaletupe 2019/2020 & 2020/2021.*

*Faaluaina e le sui usufono mamalu mo Gagaiformauga 2 ma le sui usufono mamalu mo Safata 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Tamaitai Minisita mo le lafo.

**Tofa Hon MATAMUA SEUMANU VASATI SILI PULUFANA:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae, e pei ona ou tolaulauina atu.*

*Faaluaina e le Minisita mo Leoleo ma Falepuipui, Auaunaga Tau Tinei Mu ma Faalavelave Tutupu Faafuasei ma le Minisita mo Fesootaiga ma Faamatalaga Tekonolosi.*

*Na faamaonia le Tali a le Malo.*

**P.P.2022/2023 NU.119, LIPOTI A LE KOMITI O LE VAEGA O  
ATINAE ESEESE I LE P.P.2021/2022 NU.3, LIPOTI  
FAALETAUSAGA A LE MATAGALUEGA O PUNAOA  
FAALENATURA MA LE SIOSIOMAGA MO LE TAUSAGA  
FAALETUPE 2019/2020 – ILOILOGA**

**P.P.2023/2024 NU.19, TALI A LE MALO I LE P.P.2022/2023  
NU.119, LIPOTI A LE KOMITI O LE VAEGA O ATINAE  
ESEESE I LE P.P.2021/2022 NU.3, LIPOTI FAALETAUSAGA**

## **A LE MATAGALUEGA O PUNAOA FAALENATURA MA LE SIOSIOMAGA MO LE TAUSAGA FAALETUPE 2019/2020**

**FOFOGA FETALAI:** Tulai mai lau Afioga i le Sui Taitaifono o le Komiti o le Vaega o Atinae Eseese.

**Afioga LEAANA RONNIE POSINI:** Lau Afioga i le Fofoga Fetalai, ou te tulai ma le agaga faaaloalo i le paia o le Palemene nei, le afio o le Taitai o le Malo, le Kapeneta ma le mamalu foi o le tatou Palemene, aemaise foi le paia o Ofisa Sili o Pulega o Matagaluega a le tatou Malo aemaise foi o le tapuaiga a Samoa.

Ia, ou te talitonu i lau Afioga i le Fofoga Fetalai ua ou tulai e fai ia lou faatauvaava e fai ma fofoga o le matou Komiti, e le o toe po se lilo, o lo o faataotolia le fala i le matou Taitaifono, o lea o le a fai ai lou tagata faatauvaava e tolaulauina le Lipoti a le matou Komiti. Ma le agaga faaaloalo.

Lau Afioga i le Fofoga Fetalai ou te faatu le lafo, *Ina ia faautagia e le Fono Aoa o le Lipoti a le Komiti o le Vaega o Atinae Eseese o lo o tuuina atu ai Fautuaga ma Iugafono.*

Ma le agaga faaaloalo.

*Faaluaina e le Minisita mo Leoleo ma Falepuipui, Auaunaga Tau Tinei Mu ma le Minisita mo Fesootaiga, Faamatalaga ma Fesootaiga Vavave Faaneionapo.*

*Na faamaonia le lafo.*

**FOFOGA FETALAI:** Ou te tapa ma le agaga faaaloalo lau Afioga i le Sui Taitaifono mo le tolaulauina o a outou fautuaga.

**Afioga LEAANA RONNIE POSINI:** Lau Afioga i le Fofoga Fetalai, ia, e maua le avanoa matou te tolaulau ai Fautuaga ma Iugafono a le matou Komiti. E talitonu foi e usitaia lava lau Afioga i le Fofoga Fetalai, o le a matou agai sao i Fautuaga ma Iugafono a le Komiti. E talitonu foi o le Lipoti ua uma ona taoto i totonu o le tatou Palemene, ae o le a agai se matou Lipoti i le Fautuaga a le Komiti ma Iugafono a le Komiti. Ma le agaga faaaloalo.

O Fautuaga a le Komiti, i le maea ai o le iloiloga a le Komiti i le Lipoti Faaletausaga a le Matagaluega o Punaoa Faalenatura ma le Siosiomaga, ua fautuaina ai le Malo:

### **FAUTUAGA 1:**

Pe le ua alagatatau ona silasila le Malo e aveesea mai le Vaega o Malosiaga Faafouina (Renewable Energy Unit) ae tuuina atu i lalo o le

Faalapotopotoga Malosi Faaeletise, ina ia lelei faatino le auaunaga mo le mamalu o le Atunuu.

**FAUTUAGA 2:**

Ia silasila le Malo mo le Faamatuuina mai o se Nofoga Autu ma talafeagai mo le Matagaluega ina ia tuufaatasia ai ma faafaigofiena ai le faatinoina o le latou auaunaga.

**FAUTUAGA 3:**

Ia silasila totoa le Matagaluega i ana tupe maua ma tupe faaalu ina ia mafai ona fesoasoani ai i le tamaoaiga o le atunuu, aemaise o se aofaiga o seleni o lo o auina mai fesoasoani mai fafo.

**IUGAFONO A LE KOMITI:**

Na faaiugafonoina e le Komiti e Fautuaina le Fono Aoaofaitulafono, *Ina ia faamaonia le P.P.2021/2022 Nu.3, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe 2019/2020*

Ma le agaga faaaloalo.

**FOFOGA FETALAI:** Malo faafetai i lau Afioga i le Sui Taitaifono o le Komiti.

Ou te tapa lau Afioga i le Minisita mo Punaoa Faalenatura ma le Siosiomaga mo le Tali a le tatou Malo.

**Afioga Hon TOEOLESULUSULU CEDRIC POSE SALESA SCHUSTER (Minisita mo Punaoa Faalenatura ma le Siosiomaga):** Lau Afioga i le Fofoga Fetalai ou te tolaulauina Tali a le Malo e faatatau i fautuaga a le Komiti o le Vaega o Atinae Eseeese e pei ona folasia manino e le Sui Taitaifono.

E momoli atu le faafetai i le Komiti Faa-Palemene ona o le galuega maeaea sa fitaituga i ai aua foi ni fautuaga e matimati ai se auaunaga a le Matagaluega mo se manuia o Samoa. Malo faafetai.

E momoli foi le faafetai i e sa latou taimuaina le Matagaluega o Punaoa Faalenatura ma le Siosiomaga i le vaitausaga tonu o lo o faatatau i ai le Lipoti mo le Tausaga Faaletupe lenei o le 2019/2020.

Lau Afioga i le Fofoga Fetalai, o lea ua maea ona folasia le Tali atoatoa a le Malo i le Pepa a le Palemene ae o le a ou taumafai atu i se aotelega.

**FAUTUAGA 1:**

Pe le alagatatau ona silasila le Malo e aveesea mai le Vaega o Malosiaga Faafouina (Renewable Energy Unit) ae tuuina atu i lalo o le



Faalapotopotoga o Malosi Faaeletise, ina ia lelei faatino auaunaga mo le mamalu o le Atunuu.

**TALI:**

Lau Afioga i le Fofoga Fetalai, e fia faamauina le taua o lenei fautuaga, ae o le a taumafai e faailo le auala e le mafai ai ona faatino lenei fautuaga i le taimi nei. Lau Afioga i le Fofoga Fetalai, e le mafai ona faatinoina le fautuaga mo le tuuina atu o le Vaega o le Malosi Faaafouina po o le Renewable Energy Unit i lalo o le Faalapotopotoga o le Malosi Faaeletise, ona e eseese auaunaga e faatino e nei itutino o le Malo.

O le Faalapotopotoga o le Malosi Faaeletise po o le EPC, e feagai ma tiute tauave o le faasoasoina o le eletise i maota ma laoa o le atunuu. E na o malosiaga tau eletise e fitoitonu i ai galuega a le EPC. Peitai, o Matagaluega a le Malo e aofia ai le Vaega o Malosi Faaafouina po o le Renewable Energy Unit, latou te tapenaina taiala ma faiga faavae e limataitaiina ai galuega ma atinae e faaitiitia ai le faaaogaina o suauu ma isi vaega e faaaogaina ai malosiaga eseese faapea ma tekonolosi fou faapei o eletise ma moli e alu i le la, paiokesi ma isi.

E le gata i lea o lenei vaega e fausia taiala ma faatino poloketi mo le uunaia lea o nisi o tekonolosi e faaitiitia ai le faaaogaina o eletise, po o energy efficiency products faapei o ogaumu, moli, pusaaisa ma taavale e alu i le eletise.

O le isi vaega taua o galuega a le vaega o malosi faafouina, o le faatinoina lea o galuega faalauiloa i aiga, nuu ma afioaga o nei atinae ma tekonolosi fou.

**FAUTUAGA 2:**

Ia silasila le Malo mo le faamatuuina mai o se nofoaga autu ma talafeagai mo le Matagaluega ina ia tuufaatasia ma faafaigofieina ai le faatinoina o le latou auauga.

**TALI:**

Faamauina ma lagolagoina lenei fautuaga.

**FAUTUAGA 3:**

Ia silasila totoa le Matagaluega i ana tupe maua ma tupe faaalu ina ia mafai ona fesoasoani ai i le tamaoaiga o le atunuu, aemaise o se aofaiga o seleni o lo o auina mai fesoasoani mai fafo.

**TALI:**

Talia ma ua faamauina le Fautuaga.

O le Tali lea a le Malo lau Afioga i le Fofoga Fetalai. Faafetai mo le avanoa.

**FOFOGA FETALAI:** Malo saunoa i lau Afioga i le Minisita ua faafofoga le tatou Maota i le Lipoti a le Komiti, pei ona tolaulauina e le Afioga i le Sui Taitaifono faapea foi Tali a le tatou Malo pei ona tolaulauina e le Afioga i le Minisita.

Ia, o le avanoa lenei o se tasi o sui usufono o le Maota. Ia, se i tulai mai le sui usufono mo Aleipata Itupa i Luga.

**Afioga FUAAVA SULUIMALO AMATAGA:** Faafetai i lau Afioga mo le avanoa ua tuuina mai. Ia ona o lea sa tau matau atu i le taimi toe 5 minute faapea ai o le a faaoga e fai ai nai mataupu tau lotoifale a lau Afiogai le Fofoga Fetalai ma le Ofisa nei. Ou te iloa tau ia ina amata atu ia i nai minute ae tatou te le i malolo ia nai manatu foi i motugaafa e tusa ai foi ma le Lipoti a le Komiti ua i le Laulau-a-Fono nei.

O fautuaga e pei ona aumai e le Komiti, ia e vaavaai atu i ai e 3 lava fautuaga. Ma o lea foi ua aumai tali manino a le Malo e pei ona saunoa i ai le Afioga i le Minisita. Ia ma e matau atu foi e fai foi si maotua, o le 2019/2020 le Lipoti lenei e talanoaina. Ou te iloa o le Paeaiga talu ai, le faigamalo talu ai lea e agai i ai le tulaga lea. O lo o manino foi ma e lagolagoina foi e lenei itumalo le Tali i le fautuaga 1 pei ona saunoa i ai le Afioga i le Minisita i le tulaga lea e faapea e tuufaatasi le RE po o le Renewable Energy Unit ma i i le EPC. Ia, o lea ua aumai mafuaaga ma e taua. O le tulaga lava ia i le EPC aua e pei ona i ai lana Tulafono o le EPC i le 2010, ia pei e agai lava i le service lea o le auina atu o le eletise i maota ma laoa, faasopolia si o tatou atunuu. A o i i le Division lea o le Renewable Energy, e pei o i lea e tapena mai ai faiga faavae ia ma aiaiga, aemaise lava o le fesootaiga o le malosiaga tau eletise ma le malosiaga faafouina ma le climate change po o le fesuaiga o le tau. O le tulaga lea e agai ona o le tele o mea o lo o gaosia ai po o le masini foi o lo o gaosia ai le eletise, o le tele lava o masini suauu ma kiso ma tulaga uma faapea. E tau feteenai la ma le scope po o mea ia e taumafai foi le Matagaluega lea e faaitiitia, le Green House Gas lea e mafua mai suauu ma kiso ma mea uma nei. E le gata la i masini ma afi tetele o lo o gaosia ai le tatou eletise, ae faapena foi le vaega lea i auala foi ia o taavale ma mea uma faapena. O i uma lea e produce mai ai le tele o kasa oona lea e aafia ai le siosiomaga. Ma e taua la, o le autilotilo la i ai i le Lipoti ma le faavaeina foi o lenei vaega i totonu o le Matagaluega o le Punaoa Faalenatura, o le taumafai lea e tata i lalo le mapuna mai pea o kasa oona nei.

Na pau la lea o le faiga e faaitiitia ai, o le fai o le Division lea, ina ia taumafai la latou e saili ni faiga e maua ai lava le tatou eletise ae leai se kasa oona e maua mai, lea la ua taua nei o le malosiaga faafouina po o le renewable energy, lea la ua fai ai tatou solar, o lea foi ua i ai tatou wind, ia ua fai foi si leva ona i ai le tatou hydro, le malosiaga mai le vai. O le malosi o le tafe o le vai ma le malosi o le palasi o le vai. O Samoa ma le Pasefika,

tasi lenei atunuu e faamanuia i ai le Atua e maua lava le la i le tele o taimi. O lea la ua tele foi tatou malosiaga e fau ai le eletise e maua mai le la. E faapena foi o lea ua amata le tatou malosiaga e maua mai le savili, lea e i tua i Aleipata i le matou itumalo. Ia o lo o i ai foi le faamoemoe o lenei itumalo e toe fai atu nisi tatou turbines se tele e fai ai nisi tatou terminal se tele e maua ai le tatou eletise lea mai le savilim ia leaga na pau lea o le pito o le tatou atunuu nei o le matamatagi e maua lava le savili i taimi uma.

Ia, ae o lo o i ai foi nisi o fuafuaga o lea ua i ai le tulaga lea o le faaitiitia lea o le kasa foi lea e maua mai, faaoga le kasa lea e maua ai le bio-gas, mea foi ia o otaota o meaola, aemaise foi o manu ma tulaga uma faapena, ia ma mea lava ia o laau pala ma mea uma faapena e maua mai ai le kasa lea e mafai ona fai ai ua amata i le small scale. O lau iloa pei lava o Piu i Falealili lale e i ai le isi plant feoloolo la e i ai e maua ai le kasa e fai ai le kuka ma faaoga i le gasesega o meaai, ae mafai foi pe a uma nai pilot laiti ia, ia e mafai foi ona upgrade i luga i se isi stage e maua ai se masini e maua ai se tatou eletise, ia ona faasoa foi lea e le Pulega o le Eletise, le EPC.

E pei o vaega uma ia ma le mea taua la lea, e le gata o le fausiga o malosiga ia faafouina, ae faaitiitia le kasa oona e maua mai i masini ma mea e maua ai le kasa, a o mea tau efficient. E i ai le efficiency index o lo o galulue ai foi le vaega lea i totonu o le Matagaluega, e le gata la o lea e fau lava le tatou eletise... Manatua foi le faamoemoe o le tatou Malo lea sa faaleo ina ua fai mai le fonotele lea i le 2014, le SIDS.

**FOFOGA FETALAI:** Ua ou vaelupeina le saunoaga a le sui usufono mamalu.

**Afioga FUAAVA SULUIMALO AMATAGA:** Faafetai i lau Afioga.

**FOFOGA FETALAI:** Talu ai o lea ua tatou taunuu i le tatou taimi malolo, o le a faaauau lau saunoaga i se tasi aso Fono i le lumanai e faaauau ai le tatou Lipoti.

Ua faamalo le usufono i lenei aso ma lenei foi vaiaso i le paia o le tatou Palemene. Faafetai i lo outou onosai mo le uunaia o le tatou galuega. O lea ua tatou i ai i le taunuuga o galuega o lenei aso ma lenei vaiaso, ia faamalo faafetai. E 4 a tatou Tulafono Tau Faofi na mafai ona tagofia i lenei vaiaso, e le o se galuega laitiiti. O lea ua faasolo a tatou Lipoti ma Tali a le Malo, ua faamalo le onosai, faafetai mo le faatauaina o le tatou valaauina. O galuega lava ua lelei ona tatou fai, ia foi atu pea le viiga i le Atua. Pe afai foi ua i ai se faaletonu o le taitaiga a le Fofoga Fetalai i lenei vaiaso, ou te faamalulu atu i le paia o le Palemene, e poto lava le tautai ae se lava le atu i ama.

Faafetai atu i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, malo le tautua Malo. Samoa ma lau faafofoga tapuai mai, o lea ua iu manuia le fonotaga a lau Palemene i

lenei vaiaso, malo le tapuai, faafetai mo talosaga molia. O le a foi se lafoga a lau Palemene ua le tautamalii i lau faafofoga, matou te faatoese atu, e matua atu lava lau Palemene i lau tofa faale-Atua, alofa ma faamagalo so matou aleu. A o le tatalo, ia i ai pea le filemu o le Atua i si o tatou atunuu. Ia manuia le alo atu i toega o feau o lenei aso aemaise o faiga malologa o le faaiuga o lenei vaiaso. O auunaga uma o lo o tautuaina fonotaga a le Palemene i aso taitasi, ia faamanuia le Atua i la outou tautua.

Pe a tatou tatala i lenei aso, ia tuliloaina le paia o le Palemene ma le tatou Maota i faamanuiaga a le Atua. Ia i ai foi Lona agalelei i feau o lo o faatalitali mai.

Ae tatou te le i tolopo i lau Afioga i le sui usufono mo Anoamaa 1, po o lau susuga foi i le faifeau e te saunoa se tatalo faaiu mo le tatou fonu.

***Na tolopo Taulumaga a le Fono Aoao Faitulafono i le itula e 12:05 i le aoauli seia aulia le Aso Lua, 20 o Iuni 2023 i le itula e 9:30 i le taeao.***